

6460 արևածագի բնօքագրք

891.99

առելիս Սարգիս Շղիզարեանցի (Ղարաբիլիսիցի):

Ա-79

ՍՅԵՓՈՆ ԸԿԵՑԻՔԵՄՆ—ԲՇՆԵՆՑԵՑԻ

ՂԵԿԵՎԼԱԲՆԵՔ

ԳԻՐԺ Ա.

I. ԿԱՊ ԲՌԵԱՊՀ.Ը

II. ՄԵՐ ՏԵՐԸ

(Արտատպած „Հումայ“ հանդիսից):

800
190-ԱՐ



Թ.Ի Գ.Լ.Ս

Ճպարակ Մ. Չարաձեկի, Նիկոլ. փ. ա. 21

1897

891.542-3

ԱՅԵՓԸՆ ՌԻԵՑԻՔԵԸՆ—ԲՇՆԵՆՑԵՑԻ

Ղ-79

մը.

ԴԵԿԱՎԱՐՆԵՔ

I. ԿԱՊ ԲԻՒՈՂԸ

II. ՄԵՐ ՏԵՐ

100/
10969

100/
1096

(Արտասոված „Հումայ“ հանդիսեց):



ԹԻԳԼԻՄ

Ճպարան Մ. Յարաձեկի, Նիկոլ. փ. տ. 21

1897

2011

2003

J 4 N 2 4 7 q?

Գ ԱՎՈՅՎՎՈՆ

ՄՐՄԴՅԻՍՏՎԵԿՈՒԹՈՂՄԱԴ ԻՎԱՆՈՎ

ՀՎԵՐՆԱՑՈՂՎԻԿԵՈՒՈՎ - ՀՎՏ

Mapra 3-ro Tifinje, 1897. Illehiyolo, Lloarjeho

ԱՊՐՈՎՅՏՎԵ ՍՎՏ

Ա Ր Փ Գ Տ Ա Վ Վ Ի Վ Վ - Փ Վ Ո Ւ Մ Ց

ନ୍ୟାୟନ୍ତରକାଳୀଙ୍କ ଜ୍ୟ

1810

ԿԱՊ ԲՈՆՈՅԵ

ԿԱՊ ԲՈՆՈՂԸ

Յուլիսի սկզբներին Կաթնաշխն գիւղը մեռելալին կերպարանք է ստանում. փողոցներում բացի հաւից-ճիւից ուրիշ ոչ մի կենդանի չի երևում. կանայք շուաքի տակ քաշուած գործում են կամ մանում, իսկ երեխաները լողանում են գետի մէջ։ Ամեն ինչ խոյս է տալիս արեգակի այրող ճառագայթներից, ամեն ինչ օթևան է փնտում փոքր ինչ զռվանալու համար։ Գիւղում տղամարդ չի երևում։ Ղուլունց պատի տակի շուաքում միայն շարուած են մի քանի անգործ ծերունիներ, որոնք սովորաբար խօսում են վերջին հեղեղների կամ քաղաքից ստացուած նոր լուրերի մասին։

Գիւղը գատարկ է, գիւղում «փափախաւոր» չի երևում։

—Ուր է ձեր տղամարդը, —կը հարցնեմ մի որ և իցէ Մարիամ աքօր։

— Սարին է, — կը լինի նրա պատասխանը, — ինչ ես հարցնում։ միթէ այսօրուայօրը տղամարդը տանը կը նստի, — կաւելացնի նա։

Եւ իրաւ գիւղացին տարուայ այդ միջոցին «հարամ» կը համարի իր կերածը, եթէ պարապ տանը նստի։ Նա դուրս է գալիս դաշտը։ Նրա գործունէութեան ասպարէզը այդ ժամանակ տանից դուրս հեռու դաշտումը կամ սարին է։

Ամբողջ գիւղը բարձրանում է կանաչազգարդ լեռները, սարը։ այնտեղ խոտի հունձէ։ Իւրաքանչիւր գիւղացի շտապում է հայթալիթել իր «աչքի լիս» ու հաւատարիմ ընկեր անասունի ամբողջ տարուայ ապրուստը։

Սնցնենք սարը։

Այստեղ ասեղ գցելու տեղ չը կայ։ գիւղի թէ մեծ, թէ փոքր իրանց բեռնակիր ձիաների ու ջորիների հետ միասին այստեղ են ժողովուած։ Վերջիններիս բազմաթիւ երամները ծածկել են լայնածաւալ արօտատեղերը։ Սրանց խրինջոցը, միանալով հարիւրաւոր գեղջուկների բարձրածալայն աղաղակների հետ, ականջ է խլացնում։ Գիւղացիները, գերանդիներով զինաւորուած, այս ու այն բլուրի գլխին խմբուած, տաք վիճաբանութիւն-

ներ են բանում իրար մէջ խոտի բաժանման մասին։ Աւելորդ է ասել, որ նրանց վիճաբանութիւնները համեմուում են ամենընտիր յիշոցներով։ Պատահում է, որ միմեանց վրայ գերանդի են բարձրացնում, բայց դրանք հետևանքը հեռու չի անցնում։ Յիշոցները գլուխ խաւորապէս ուղղուած են լինում։ Ինտերը բաժանողի հասցէին։ Վերջինս խոտի հնձից մի շաբաթ առաջ «ընտրուում» է ամբողջ համայնքից, — ընտրողները իսկապէս տանուտէրն ու մի քանի աղսախկալներ են լինում, — ու մի որ և է գրագէտի ուղեկցութեամբ գլունում է սարը խոտատեղերը գիւղի ծխերի մէջ բաժանելու։ Սարի այն մասը, որը յատկացրած է լինում խոտերին և որն անարատ է մնում մինչև խոտի հունձը, բաժանուած է մի քանի գլխաւոր մասերի։ Բաժինների թուին համեմատ կազմուում են բաժանաթղթեր, որոնց մէջ որոշւում են իւրաքանչիւր բաժնի սահմաններն ու տարածութիւնը։ Բաժանաթղթերի թուի համեմատ կազմուում են ծխերի, այսինքն տների, ցուցակներ ու այդպիսով իւրաքանչիւր խոտաբաժին ընկնում է տասը կամ քսան տան։ Վերջիններս կամ միասին հնձում են խոտը ու հնձածը բաժանում, կամ բաժանում են իրար մէջ ընդհա-

նուր խոտաբաժինը ու առանձին հնձում: Ըսդ-
հանուր բաժինները վիճակ են գցուում տնե-
րի մէջ, կամ թէ, ինչպէս գիւղացիներն են
ասում, ծեղ են գցուում, այդ պատճառով էլ
բաժանաթուղթը կոչում է «ծեղ»:

Կաթնաշէնում խոտերի բաժանող համա-
րեա ամեն տարի սովորաբար ընտրուում է
Սևունց Եղին: Սրան ի պատիւ ծերութեան
բոլորն էլ Եղի ամի են ասում: Գիւղացիները
թէւ մի առանձին համակրանք չեն զգում
գէպի նա, բայց այնուամենայնիւ էլ գործ չի
լինում, որ Եղի ամու ձեռքովը չանցնի, էլ
բան չի մնում, որ նրա մատը խառը չը լինի
մէջը: Պրիստաւ կամ գաւառապետ եկած ժա-
մանակ Եղի ամին է գիւղացիներին «պարզ ե-
րես անում» աղի առաջին շնորհիւ իւր ճար-
տարախօսութեան. մի որ և է խաթա (աղէտ)
է պատահում, Եղի ամին է նրանց կապը
բռնում ու ուղիղ ճանապարհ գուրս բերում:
Նատ եռանդուն ու փորձուած «կապ բռնող»¹⁾
է Եղի ամին և հէնց շնորհիւ իր այդ փոր-
ձառութեան է կարողանում կաթնշէնցոց պէս
ինքնագլուխ ու անհնազանդ մարդկանց կա-
պը իր ձեռքում պահել միշտ: Խոտերը բա-

¹⁾ Հասարակական գործիչ, ղեկավար:

ժանելիս Եղի ամին իրան մի առանձին ձանձ-
րութիւն չի պատճառում երբէք. նա այնքան
փորձուած մարդ է այդ բանում, որ բոլորո-
վին աւելորդ է համարում խոտատեղերը շըր-
ջել լաւը վատից ջոկելու համար: Սովորաբար
բարձրանում է մի որ և է լեռան գագաթ,
այնտեղից դիտում խոտերի ամբողջ տարածու-
թիւնը ու որոշում բաժինների սահմանները:
«Դրի, ագա», — ասում է նա գրագրին ու ըս-
կում թելագրել բաժանաթղթերը, ծեղերը:
Երբեմն պատահում է, որ գրագիրը մի որ և
իցէ նկատողութիւն է անում Եղի ամուն, ա-
սելով, որ այս ինչ բաժինը շատ փոքր է, կամ
թէ այնտեղ խոտ քիչ կալ:

— Ե՛, հա երանի իմ էս կատարիս, որ
դու պետս ինձ խելք սովորեցնիլ, — պատաս-
խանում է նրան արհամարհանքով Եղի ամին,
— դու գրի, ինչ որ ես ասում եմ, քո բանը
զալամի¹⁾ ճռմռոցն է: Երէկ-մէկէլ օրը դու
այսքան փոքր երեխայ էիր, հիմա մի-երկու
այիբ-բէն ես սովորել, գիտես, թէ մեծ մարդ
ես դարձել, որ իմ խելքի կտրածին հաւան
չես կենում:

— Եղի ամի, ահը անցեալ տարի այդ բա-

¹⁾ Գրչի:

Ժինը մեզ ընկաւ, խոտ չի կար, բոլորովին մաղբուն մնացինք¹⁾: Հիմա էլ մի որ և իցէ խեղճի կընկնի, ճարը կտրած խոտ բաժանուղին ուշունց կը տայ: Մեծ մարդ ես, արի այդպէս մի անիր. հոգիդ խեղճ ա, այսօրվաղը մեռնելու ես, հէնց արա, որ քեզ ոզորմի ասող լինի: Եկ ինձ լսիր, այն երևացող ձորամէջն էլ այդ բաժնի հետ գցիր. այնտեղ լաւ խոտ կայ. անցեալ շաբաթ ես ինքս այնտեղ եղել եմ ու բոլոր խոտերը լաւ զըննել:

— Զէնդ կտրի, խէվ հարամ զադա²⁾. գնա այդ քո վարժապետին սովրացրու: Դէ Տէր-Պետրոս, եկ ամեն օր մեր եղծումը³⁾ քարոզ տուր,—ասում է նա ինքն իրան, — թէ շկոլ բաց արեք, վարժապետ բերել տուէք: Երէցին լսում ենք, շկոլ բաց անում, վարժապետ բերել տալի, ջահիլ-ջիուլը գնում է այիբ-բէնի հոտն առնում ու գալի մեզ խելք սովրացնում: Ահր ըսհէնց բան կլինի, երկիր-աշխարհ ըսհէնց բան տեսել ա: Մըա չափ վախտս (ցոյց է տալիս նա դէպի գրագիրը) ովկ կը համարձակուէր իրանից մեծին ասել, թէ աչքիդ վերեն ունք կայ: Ինչ հողը գըլ-

¹⁾ Զրկուեցինք: ²⁾ Յիմարի որդի: ³⁾ Եկեղեցում:

խիդ տաս, որ հիմա բոլորն էլ Տէր-Պետրոսի խօսքովն են բան բոնում ու իրանց տներն իրանց ձեռքով քանդում: Գրի, աղա, գրի, — դառնում է նա դէպի գրագիրը, — քեզ ինչ ասեմ. դու մեղաւոր չես: Աստուած Տէր-Պետրոսի ու քո վարժապետի տները քանդի. գրի, — կրկնում է Եղի ամին ու բոնոթին ախորժակով վեր ծծում:

— Եղի ամի, հիմա ինչ որ է, այդ թող իրան կենայ. արի այս մի բանումն ինձ լըսիր, ձորամէջը այս բաժնի հետ գցի: Խեղճ ա դորա տէրը, նա էլ քեզ պէս թագաւորին հարկ ա տալիս, նա էլ քեզ պէս առանց հայվան¹⁾ ապրել չի կարող, նրան էլ հարկաւոր է խոտ:

— Ադա, ա թուրքի հանք, ահը բաւական է, ինչքան զահլէս տարար, ասելը մին կը լինի, երկու կը լինի. հոգիս թող հանգիստ իր տեղը կենայ, ինձ մեղքի տակ մի գցիր, Վարդավառին պիտի հաղորդուեմ, ա քո. . . Տէր, մեղայ քեզ Աստուած, բերանս ինչ ա գալիս. . . :

— Ահր ձորամէջն ինչու ես զրալ²⁾ դընում, պատճառն ինչ ա, միթէ նա գիւղին

¹⁾ Անասուն: ²⁾ Մի կողմ:

չի պատկանում, — տաքանում է գրագերը,
Եղի ամուց իր մօր հասցէին մի ոչ այնքան
դիւրեկան հաճոյախօսութիւն լսելով, — Բնչու
համար ես ուզում դու այդ ձորամէջը ուրիշ
բաժնի վրայ դնել, քանի որ նա այդ բաժնին
է կպած:

— Ձորամէջը ոչ մի բաժնի վրայ չեմ դը-
նում, — պատասխանում է համբերութիւնը
հատած Եղի ամին, — այդ ընհէնց իմ յօժար
կամքով դրադ եմ դնում միայն Սարգիս-բէդի
ու ստարշինի¹⁾ համար: Նինիս աչքը, լոյսն
ու զարդարանքը նրանք են, ա որդի, պէտք
ա մեծից սկսած մինչև փոքր ամեն բանում
նրանց շահենք, նրանց խաթըն առնենք: Դու
դեռ երէկ-մէկէլ օրուայ երեխան ես, դեռ
քեօփա²⁾ ու ջահիլ ես, սևն ու սպիտակը
դեռ իրարից չեռ ջոկում. դու Բնչակէս կարող
ես իմանալ այդ մարդկանց դադը³⁾: Քո
վարժապետը թող գայ դեռ առաջ ինձանից դաս
առնի ու յետոյ ձեզ բէն-ալիբ-բա, բէն-եչ-բէ
սովորեցնի:

Խեղճ գրագերը, լսելով Եղի ամուտուած
անունները, երկիւղածութեամբ կծում է պո-

¹⁾ Տանուտէրի: ²⁾ Կաթնակեր: ³⁾ Պա-
տիւը:

ԶԵ ու կըկին շարունակում սուս ու փուս
«Ճռմռացնել» գրիչը:

Բլուրներն աւելի ու աւելի են սեանում.
գիւղից նոր և նոր խմբեր են գալիս: Սարը
կեանք ու կենդանութիւն է ստանում, ուր
դարձնես հայեացքդ, ամեն տեղ գիւղացինե-
րի ստուտը խմբեր կը նկատես: Մի տեղ շա-
րունակում են տաք վիճաբանութիւնները,
մի ուրիշ տեղ կէսօրելու են ժողովուել: Աը-
րանցից որը քնածէ, որը գերանդին է սար-
քում, սրում, որը Եղի ամուն է բամբասում:
Խոտ հնձող դեռ ոչ մի տեղ չի երևում. հնձի
առաջին օրը սովորաբար անց է կենում այդ
վիճաբանութիւնների, բամբասանքների, կամ
ըստ գիւղացոց «զոբոցի» մէջ:

— Եարաբ¹⁾ մենք այդ քեօփակից²⁾ Երբ
պէտք է պրծնենք, — ասում է Բաղունց Կա-
րապետը, — շէնս դա քանդեց, քարուքանդ
արաւ: Բա մենք խեղճ չենք, մեղք չենք,
մեզ Աստուած չի ստեղծել, մենք թագաւորի
ըռհաթ³⁾ չենք: Ե՞րբ պտի շէնս այդ մար-
դակելների ճանկերից դուրս գայ, Ե՞րբ պտի
մեր հացը հալալուիլ: Կալի հողումը խոտ

¹⁾ Արդեօք: ²⁾ Ծերունուց: ³⁾ Հարկատու-
հպատակ:

կայ, որ այնտեղը Սևունց Եղին տասնութ
տան է տուել, թէ գնացէք, հնձեցէք։ Ահը¹⁾
ես ընտեղ ինչ հնձեմ, ուր մի ծեղ, մի չոփ
չես գտնիլ. թէ աչքդ կոխես։ Ըսհենց բան
կը լինի, ա խալիսը (ժողովուրդ), ըսհենց օյին
ու մասխարութիւն կը լինի։ Կալի հողը Երբ
է զուրուղչի¹⁾ երես տեսել։ Զատկիցն սկսած
մինչև օրս այնտեղ Սարգիս-բէգի ոչխարներն
ու ձիաներն են արածելիս ըլել, իսկ հիմա
Սևունց Եղին ջուրտ աղբը ձորամէջի կատա-
զած խոտերը նրան ու ստարշինին է տուել
ու ինձ տասնութ տան հետ ուղարկել Կալի
հողը, թէ՝ Կարապետ, գնա ընտեղ խոտ հըն-
ձի։ Ահը Կարապետը քեզ թաղի, Սևոնց Եղի,
Կալի հողումը խոտ կայ, որ նա գնայ հնձի.
մարդ անաստուած կը լինի, այդքան էլ կը
լինի։ Չեմ իմանում այդ քեօփակին ով ա վա-
քիլ²⁾ ջոկում, թէ՝ գնա խոտերը բաժանի:
Էսօր քսան—երեսուն տարի է, ինչ աչքս բաց
եմ արել. ամեն տարի այս բանը դրա ձեռ-
քովն է անց կենում ու ամեն տարի միջի մաղ-
բունը ինձ պէս քեասիբն³⁾ է մնում։
—Ո՞նց թա ով ա դրան ջոկում, միթէ

1) Խոտերի պահապան։ 2) Լիազօր։ 3) Ա-

1001
1001

չես իմանում, —խօսում է Վարանանց Թու-
նին, —Երբ մենք դէս ու դէն ցրուած ամենքս
մեր քեասիբութիւնին ենք գնում, Սարգիս-
բէգն ու ստարշինը Եղին աչքով-ունքով են
անում ու դէպի սարը ճանապարհ գցում։ յե-
տոյ մի քանի իրանց իմացած մարդկանց ա-
սում են. թէ Սևունց Եղին ուղարկել բնք
սարը խոտերը բաժանելու։ Այդ մարդիկն էլ,
որոնք սաղ տարին շինիս մեծերի չորս կողմն
են շուռ գալիս, ասում են. «Հատկաւ էք ա-
րել. Եղին է, որ խոտերի ժամանակ կարգ,
կանոն է պահապանում. եթէ նա չը լինի, իւ-
րաքանչիւր տարի արիւնչեղութիւն կը պա-
տահի սարին»։ Եւ այդպիսով Եղին դառնում
ամբողջ շինի վաքիլ, հասարակի¹⁾ կողմից ընտ-
րուած ու յետոյ իր խելքի կտրածն է անում.
այդպիսով Սևունց Եղին մեզ էշ շինած, մեր
կապը միշտ իր ձեռքումն է պահում։

—Դրուստ ես ասում, ա Թուն, դրուստ,—
մէջ է մտնում Խալիքանց Դաւիթը, —շինիս ո՞ր
բանը չի ընդհէնց անցնում։ Որ մենակ խո-
տերի բաժանելը լինի, դա գլուխը քարը, եօ-
լա կը գնայ. թէ խոտ, թէ հանդ, ամեն բան
այդ մարդկանց ձեռովն է անցկենում, իսկ

1) Հասարակութեան համայնքի։

մէջ տեղը մեր տունն է քանդւում, մենք
ենք զրկւում, կուժն ու կուլէն վերջը մեր
գլխին է կոտրւում: Ի՞նչ անես, ձեռուքդ ի՞նչ
է գալիս. ոչ գիր ենք գիդում, ոչ զալամ.
հայվան մարդիկ ենք: Որ շլապկաւորի հետ
խօսում ենք, ձեռաց¹⁾ զակոնից ու մեծա-
ւորից է խաբար տալիս ու աչքերնիս կա-
պում: Նիսիս սուդիեքն ու իշխաններն էլ հօ-
մեր միսն է մնացել, որ ուտեն. էլի մեղայ
շլապկաւորներին, ոչ մեղայ դրանց: Սովի տա-
րին ամբողջ երկու ամիս տանով-տեղով չար-
չարուեցի, շան օր, շան հալ քաշեցի, Լալուկ
քարի գլխին մի հող խմհատ²⁾ արի ու վա-
րեցի: Առաջի տարին այնքան էլ չեկաւ, բայց
երկրորդ տարին հողս կատաղեց. էն տարին
իմ տունը համարեա թէ նա պահեց: Էս որ
տեսաւ Նարմաղանց Ստեփանը, ատամները սը-
րեց: Ինքը սուդիա լինելով, ստարշինի հեա
խօսքը մին արաւ ու մի կիրակի օր եխծի դը-

¹⁾ Խսկոյն:

²⁾ Խմհատ անել՝ կը նշանակի հողը մաք-
րել թփերից, արմատներից ու այդպիսով պիտա-
նի դարձնել գարելու համար: Խմհատը մնում է
միշտ տիրոջ սեպհականութիւն ու երբէք ուրիշ
համայնական վարելահողերի հետ բաժին չի դը-
ւում:

ռանը յայտնեց խալխին, թէ խալփանց Դաւ-
թի Լալուկ քարի գլխի հողն էլ պէտք առ-
ըիշ վարելահողերի հետ բաժին դնուի ու ծեղ
գցուի. ում որ ընկնի, թող նա գնա վարի:—
Աղա, Ստեփան, այդ ոնց հող ա, որ գու ու-
գում ես բաժին դնել,—ասացի ես,—ով է
ինձանից առաջ այնտեղ վար արել, ով է սերմ
գցել: Անվերի քօլ¹⁾ ա ըլել, ես եմ խմհատ
արել. տանով—տեղով, սոված-ծարաւ արին
քրտինք եմ թափել վըան, իսկ հիմա դու
ուզում ես ձեռքից խլել: Բա քեզ Աստուած
չունես, խեղճ չեն իմ խիզանը²⁾, էս եղծէն
էլա վախում չես:—Ո՞վ ա ասում խմհատ ես
արել, ում գլուխ ես ուզում կապել,—պա-
տախանեց Ստեփանը,—երկու քար ես դէն
ձգել ու մի արմատ պոկել—խմհատ ես արել:
Որ ըտհէնց ա, ես էլ կը գնամ Զոփուրանց
երկու-թևի³⁾ հաչա-կաղնին պոկեմ ու հողը
վարեմ և յետոյ ասեմ, թէ նա իմ խմհատն
ա, թող չեմ անիլ, որ հասարակի հողերի հետ
բաժին դնուի»: Խալխը ծիծաղեց: Ստեփանը
ինքնաբաւականութեամը դարձաւ գէպի գրա-
գիրը, ասելով. «աղա, գրի, գրի Խալփանց

¹⁾ Վայրենի անտառ: ²⁾ Երեխաները: ³⁾ Եր-
կու թէի-երկու կողմից վարուող հող:

Դաւթի Լալուկ քարի գլխի հողը: — Ի՞նչ, —
Հարցրեց գրագիրը, — Հողը, թէ խմհատը: —
Հողը, — պատասխանեց բարկութեամբ Ստե-
փանը, — խուլ ի՞ր, լսեցիր ոչ, որ ասացինք,
թէ նա ընտեղ խմհատ չի արել: Գրագիրը
գրեց սուդիի ասածը: Մի շաբթից յետոյ Սե-
ւունց Եղին բորձբացաւ սարը հողերը բաժա-
նելու. ծեղ գցեց, — Աստուած ինքն այն ծեղ
համարի, — ու խմհատս ընկաւ Շարմաղանց
Ստեփանին: Էս օր թամամ երեք տարի ա,
ինչ նա խմհատս վարում ա, ինչ նրա հացն
ա ուտում: Իսկ ես վափախս աչքերս գցած,
ձեռս ծոցումս դրած ամեն կիրակի գնում եմ
եխծի դուանը կանգնում, թէ տեսնեմ երբ է
Սևունց Եղին հողերը բաժանելու և ինձ ինչ
բաժին է տալու, որ գնամ վարեմ:

— Սևունց Եղին... Աստուած Սևունց Ե-
ղիի տունը քանդի, — խօսում է կրկին Բա-
ղունց Կարապետը, — այդ քեօփուկը որ Աս-
տուածանից չը վախի, մեզի եսիր ¹⁾ կը տա-
նի, դուք ի՞նչ էք գիտում: Լաւ դա ու Տէր-
Մսէսանց Մինասը չէին, որ կոուի տարին
Աւագանց Մաթոսի թւեի տակը մտած ուզում
էին նրան իր եղբօրտանցով բէդութիւն տան,

¹⁾ Գերի:

շինիս վրայ տէր շինին:

— Կարապետ, դու լաւ կիմանաս, Մա-
թոսը գրանց ի՞նչ էր տուել, որ այդ քեօփակ-
ները նրա համար այնքան տափերը պոկում
էին ¹⁾, — Հարցնում է Վարանանց Թունին:

— Ոնց թա ինչ էր տուել, իսկ գիտում
չես: Մաթոսը ակոօժնի սուգումը զուլլուղ ²⁾
էր անում, Եղին ու Մինասն էլ նազար-բէգի
հետ տափի դաւի ³⁾ ունէին. Աստուծու օրն
ակոօժնումն էին մթնացնում ու Մաթոսի
տանը: Նէնս որ քանդէիր, ոչ Մինաս կը գըտ-
նէիր, ոչ Եղի, — Հարիրդա շհարներում ⁴⁾ կո-
րած էին լինում: Մաթոսը դրանցից կերաւ,
կերաւ, յետոյ միտք արաւ՝ այս մարդիկը շի-
նի իշխաններ են, ինձ մօտ գործ ունին, սը-
րանցով կարելի է մեծ բան ձեռք բերել: Ասելն ու սկսելը մին արաւ. սկսեց ինքը նը-
րանց ուտացնել, խմացնել, նրանց համար
մուհտայ ատվակատութիւն անել ու ըտհէնց
անելով մեր պարուն Մաթոսը կամաց-կամաց
իր միտքը նրանց բաց արաւ: Թէև դժուար
էր նրանց համար այդ բանը գլուխ բերել,
բայց ճար չի կար, վիզ կալան: Էն տարին էլ

¹⁾ Աշխատում էին: ²⁾ Ծառայում էր: ³⁾ Վէճ:

⁴⁾ Քաղաքում:

Հօ, ա Թուն, շենս կամիրան էին գրում, այդ
դու գիտես:

— Բա, ոնց չեմ գիտում. Էն որ հաշա-
սախկալը եկաւ շենս, սուդիաներին թակեց,
ստարշենին տուն գցեց, Եալզալաղեցի հասան-
բէգին բխովեց¹⁾ թա գող ա պահում:

— Հա, հա. ապրես, ըղորմի քո հօրը,
հէնց էն տարին: Մեծաւորը երբ եկաւ տնե-
րը գրելու, Եղին ու Մինասը, իբրև շինի իշ-
խաններ, կանգնեցին, թէ Աւագանք տէրտէ.
Ծի թոռներ են. նրանք պէտք ա ըոհաթի
շարքէն հանուեն ու ազնուականների շար-
քումը գրուեն: Մեծաւորը, Աստուած նրա
որդիքը պահի, մի լաւ, հալալ քրիստոնեայ
մարդ էր, ասաց. որ միայն իշխանների խօս-
քով ես այդպիսի բան չեմ անիլ. թող գիւ-
ղացիք բոլորն էլ իրանցից մի պըիզօվօր²⁾
տան, թէ իրանք համաձայն են նրանց բէգու-
թեանը: Այս որ լսեց Մաթոսը, Եղիի ու Մի-
նասի հետ միասին ընկաւ շենս, որ ոնց որի-
ա պըիզօվօրը շինի: Մինին խաթելով, միւսին
մի զատ տալով, մէկալին վախեցնելով, Մա-
թոսը վերջապէս պըիզօվօրը շինեց:

— Խափել ես ասում, բաց թողնում,—

1) Շղթայակապ: 2) Համախօսական:

ընդհատում է նրան Խալփանց Դաւիթը, — ինձ
եկաւ ասեց. «Դաւիթ, թուղթ ենք շինում ա-
ռաջնորդին ուղարկենք, որ մեր շկոլի համար
վարժապետ նշանակի. Եկ սրան դու էլ ձեռք
քաշի»: Ձեռքը քաշեցի, բայց մի շաբթից յե-
տոյ իմացայ բանն ինչումն ա. գլուխ թակե-
ցի, բայց էլ ինչ կարող էի անել:

— Դէ էլ գլուխներդ ինչ ցաւացնեմ: —
շարունակում է Կարապետը, — դուք ինքներդ
էլ գիտէք, որ յետոյ Մաթոսը ուզեց մինչև
անդամ շենս իր վրայ հաստատի. ոնց մենք
տանով, խիզանով գնացինք գբոնատի ոտներն
ընկանք, լաց եղանք, աղաչեցինք, պաղատե-
ցինք, որ մեզ մի կերպ Մաթոսիցն ազատի.
Ետնայ գբոնատը ոնց մեր իշխաններին հա-
ւաքեց, ուղարկեց քաղաք¹⁾ սարդարի կուշ-
տը, որ գոնեա նա մեզ մի ճար անի: Դէ էլի
սարդարն ապրած կենալ, տեսաք, որ նա մեզ
եսիրութիւնից ազատեց:

— Բա, Աստուած սարդարին հաստատ պա-
հի իր թախտի վրայ. նա մեզ Մաթոսից թա-
փեց, թէ չէ մենք հիմա վաղ էինք կորել, —
պատասխանում է Դաւիթը:

— Էլի մեղայ Մաթոսին, — կըկին շարու-

1) Թիֆլիս:

նակում է Կարապետը, — Նրանից մի անգամից
պրծանք, ականջնիս դինջացաւ, իսկ տեսնում
էք, որ Սևունց Եղին շարունակում է մեր տը-
ները քանդել ու մեր ծուխը կտրել։ Սարին
ինչքան խոտ կայ բոլորը մի քանի մարդակե-
րերի ա տուել ու մեզ պէս քեսսիբ-քսուբին
զրկել. ըտհէնց ա տնում և հողերը բաժանե-
լիս, և հանդը ծախելիս, իսկ մենք հայվանի
պէս մնում ենք էն կողմին կանգնած։ Հիմա
էլ էս ա օրս մթնում ա. տեսնում էք նա
լիս աշխարհ չի դուրս գալիս, թէ հետը խօ-
սանք, մի բան մասլահաթ անենք. կորած ա,
ով ա գիտում որ սե ատակի ա։

— Ո՞նց թա որ սե ատակի ա, — խօսում
է Ատրանանց Թունին, — նա հիմա ստարշինի
հետ միասին Սարգիսբէգի ալազուխում ոչխա-
րի խորովածը գցած լաւ քէփի վրայ ա։ Նա
որիայօր եօթանասուն տարեկան պառաւ մարդ
ա, շէնամիջից դուրս չի գալիս, հազար ու մի
կեղտոտ բան ա բոնում ստարշինի ու շինի
մեծերի խաթրն առնելու համար, հազար ու
մի ուշունց ու դէյբաթ¹⁾ ա լսում գիւղա-
ցոնց ահից, պատճառ նրա, որ պրիստաւ ե-
կած ժամանակ ոչխարի համ ա տեսնում, սա-

ըին խոտերը կամ հողերը բաժանելիս էլի ոչ-
խար ա ճանդ գցում. կենդ-կենդ էլ, եթէ այդ
ձեռուքը գալիս է, շէնամիջի բազի²⁾ ա կուլ
տալի ու այդպիսով պորտը հաստացնում, — մի
խօսքով այդ մարդը միշտ իր մեռել-կենդանը
քաշել ա տալիս միայն լափել ու լակելու
համար։

— Այ նա օձի միս լափի ու զահըումար
լակի, բալքի նրան սպանի հա, — զալրացած
ասում է Դաւիթը։

— Հրէս էգուց ոնց որի ա էստեղերք կե-
րեայ, — շարունակում է Թունին, — որ շատ
էստեղից, էնտեղից սկսեցին նախատել, էլի կը
սկսի ինքն իրան հայհովել ու ասել, թէ մին-
չե մահս սհէ բանի էլ ես ձեռք չեմ տալ,
իսկ եկող տարին մէկ էլ տեսար Եղին կրկին
սարը խոտ բաժանելու ա եկել։ Ե՛ հա դրա
որն ասեմ, որը խոստովանեմ. գա չէր որ մէ-
կէլ տարին հազար ու մի փանդուփունդով
սուտ պրիգօվօր շինեց ու Պօղոսանց Զաքա-
րին, որ ստարշին վախտը երեք հազար մա-
նէթ շէնամիջի փող էր կերել, պրծացըեց։
Դեռ վերջը, դուք ինքներդ էլ այդ լաւ գի-
տէք, որ Զաքարը քիչ մնաց Եղին գլուխը թա-

¹⁾ Բամբասանք։

²⁾ Փող։

կի, 13 մանէթ միայն ընկաւ այդ քեօփակի ճանկը: Ահը արդակիսի անաստուածութիւն կը լինի. ես տղիս նոքար¹⁾ տամ, ինքս գնամ հեռու արանումը չոր քարին կրակ անեմ, փող աշխատեմ, որ յետոյ այդ արին քրտինքով աշխատած փողերը Պօղոսանց Զաքարը տանի իրա համար շհարումը²⁾ տներ շինի, իսկ ես մնամ սոված էն դոլին կանգնած: Ահը էդ Աստուած վեր կունի, էդ բոլորը Եղիի արարմունքը չի: Աղա, աղա, — դառնում է նա իր փոքրիկ տղային, — գնա մի կուլէն աղքրից ջըռով լցրու, բեր խմենք, ծարաւ մեռալ:

— Լաւ էդ խեղճ երեխին ուր ես սարը բերել, միթէ դա բան անող ա, — նկատում է Թաւիթը Թունիին:

— Է՛, տնըլինի մարդ, ինչ ես ասում, — պատասխանում է Թունին, — էս օրնա, որ փետին փալաս են փաթաթում ու բանեցնում, նաքի թա երեխին ուր ես բերել:

Միւս օրը վաղ առաւօտեան գիւղացիների մեծամասնութիւնը իր «զոբոցը» վերջացրած սովորաբար սկսում է խոտի հունձը: Սարն այդ միջոցին մի առանձին կերպարանք է ստանում: Առաւօտեան արեգակը մի նոր կեանք

1) Ծառայ: 2) Քաղաքում:

ու կենդանութիւն է ներշնչում գործունեայ ու եռանդուն շինականին: Սար ու ձոր թընդացնում է նա իր երգերով, «Հաղով»: Նրա գերանդիի զընգոցն ու թըրընփոցը «ասմանն է» գնում: «Խալիս Ինգլիզ ա, Ինգլիզ¹⁾, սրանանը մեռնի, — ասում է նա իր գերանդիի մասին ու շարունակում եռանդով շարժել իր հալալ աշխատանքի այդ անմեղ զէնքը: Թէ բըլուր, թէ ձոր ծածկուած են աշխատաւորների բազմութեամբ: Մի տեղ երեք-չորս ջանաթափ ջահիներ բաս մտած²⁾, թւեքերը մինչև արմունկները վեր քաշած, ոտքերն ամուր գետնին յենած ու միաշար կանգնած ամենայն արագութեամբ շարժում են գերանդիները մի աղ, մի ձախ ու ամեն մի շարժումով «աշխարհ են տեղը նստացնում»:

— Նազար, հա, անունդ տափը չի գցես, հէրդ ու մէրդ³⁾ խեղճ են. նրանց ճարն ու իւլաջը դու ես, հէնց արա, որ Սողոմոնը առաջ չի ընկնի, — նկատում է նրանցից մինը եր ընկերին:

— Աղա, ա Զատ, ինչ ես ասում: Մգամ Նազարը ոնց ա մեռել, որ Սողոմոնը նրա

1) Անգլիացու շէնք: 2) Բաս մտնել — մըցել: 3) Հայրդ ու մայրդ:

առաջն ընկնի. Էս փափախը գլխիս հարամ չի ըլիլ, որ ըտհէ բան պատահի՞,—պատասխանում է հապարտութեամբ նազարը, շարունակելով եռանդով շարժել գերանդին. — Հ'ը, հ'ը, Ե ջան Ե քե մատաղ, Ինգլիզ, — անդադար կրկնում է նա:

— Նազար, հաւա մի վեր ունիր¹⁾. — Նը. կատում է նրան Սողոմոնը, — Զատին քեզ աչքով-ունքով արաւ, ամա դա զատ չի շինիլ: Դու տղայ ես, մարդ ու մարդանայ հետս եկ: Բա իմ կերածը հարամ չի լինիլ, որ քեզ պէսը առաջս կտրի:

— Ես ա հրէս կերևայ, կերևայ, ա Սոլ, մէջ է մտնում Զատին, — դու ըտհէնց պեծին կրակին մի անիր: Դեռ նոր ենք սկսել, դոչաղ ես դուրսուր գալիս. Հրէս մի սհաթից ետը կերևայ, թէ ում մէր տղայ կը բերի: Նազար, հա քե մատաղ հա, նազար, Ինգլիզիդ լաւ ածոց արա, հա, աջան հա, ըտհէնց, ապրես, — քաջալերում է նա նազարին:

Զահիլները շարունակում են եռանդով առաջ գնալ ու իրար քռեխ կրծելք: Արեգակը կամաց-կամաց բարձրանում է հորիզոնի վրայ, ձգելով իր սսկեփայլ ճառագայթները

¹⁾ Մի պարագանար:

պէսի կանաչազարդ հովիտներն ու մարգագետինները: Վերջիններս ծածկուած են առաւօտեան թանձը մառախուղով, որն արեգակի ազդեցութեան տակ, մաս-մաս կծկուելով, այս կողմն այն կողմն է անհետանում: Զորերի խորքերից երբեմն-երբեմն լսելի է լինում հովուի սրնգի կամ նախըչու պկուի ձայնը, որը, միախառնուելով հարիւրաւոր հնձողների աղաղակ-ների ու երգեցողութեան հետ, լցնում է օդը սքանչելի մեղեդիով:

Քիլիսաղարի¹⁾ առուի ափին նստած է մեր ծանօթ Վարանանց Թունին: Գերանդին մի կողմը ձգած, ոտաքոքիկ ու գլխաբաց, նա զբաղուած է տրեխ կարկատելով:

— Ա՛ Թուն, հէ ա Թուն, Թունի, — կանչում է նրան ձորի միւս կողմից Բաղունց Կարապետը:

— Հէլ, Բնչ կայ, Խէր ըլի, — ձայն է տալիս Թունին:

— Ո՞նց թա ինչ կայ, — հարցնում է նրան զարմացած կարապետը, — իսք ես ըտհէնց անմեղացել. մաջալ²⁾ ես դտել, որ նստել ես տրեխ կարկատում, էս օր օր օր ա: Ընկեր ես, դու էլ ինձ պէս բաժնիցը մաղբուն ես

¹⁾ Եկեղեցաձոր: ²⁾ Ժամանակ:

մնացել, եկ գնանք խոտ բաժանողի եախիցը
կախ լինենք, աչքը հանենք ու խոտ պոկենք
նրանից: Բա չուայ որ օր պտի նա մեր արի-
նը ծծիլ, մենք խի իսան չենք:

— Արա, Կարապետ, դիմ չես, պել չես,
եկ ինձ լսիր, էդ զալմաղալէն հեռու կաց:
Սևունց Եղին մեզ խոտ չի տալ նհախ տեղայ
մեր մեռելներն էլ քաշիլ կը տանք, էդ կը
լինի մեր աշխատանքը:

— Ո՞վ ա ասում, թա մեռելները քաշիլ
կը տանք, դու վեր կաց, չեմ-չեմ մի անիր,
տրեխներդ կեց: Էսօր որ ես արին չանեմ,
մգամ սիրտս կը հովանայ, — պատասխանում
է բարկութեամբ Կարապետը ու շարունա-
կում շտապեցնել Թունիին: Խեղճ Թունին
ճարը կտրած տրեխները մի հանգաւ ոտներն
է գցում ու Կարապետի հետ ճանապարհ է
ընկնում դէպի Գեօլի զրադը, որտեղ այդ ա-
ռաւոտ «լիս աշխարհ» է դուրս եկել Սևունց
Եղին: Գեօլի զրադին անբաւականների մի մեծ
խումբ շրջապատել է Եղի ամուն: Վերջինս
գլխաբաց, փափախը կոնատակին դրած, կա-
շուէ բռնոթամանը ձեռքին վիթխարի սեան
պէս կանգնած է նրանց մէջ: Բոլորն էլ ձրգ-
ձգում են նրա շորերը, բոլորն էլ խոտ ու
բաժին են պահանջում: Խեղճ Եղի ամին էլ

չի իմանում, որին պատասխանի, որին «քար-
սազի»¹⁾ անի. բայց նա այդպիսի դալմաղալ-
ներում այնքան փորձուած է, այնքան ըն-
կած-դուրս եկած մարդ է, որ ոչ թէ միայն
գլուխ չի կորցնում, այլ դեռ «ըռեխ էլ է
ճղում»: Գիւղացիք տաքացած սաստիկ բարձ-
րաձէնում են, բայց Եղի ամին նրանց գերա-
զանցում է: Կարելի է ասել, որ նա շնորհիւ
իր այդ ընդունակութեան է այնպիսի նշա-
նաւոր դեր խազում Կաթնաշէնցոց «շէնամի-
ջի» գործերում: Նրա ձայնը անհամեմատ հե-
ռու է գնում: Հնձողները, հեռուից լսելով
Եղի ամու որոտոցը, երբեմն ասում են՝ «չոռ,
չոռ ա Եղ, ըշտա երբ պիտի քո ձայնը այս
սարէն կտրուիլը: Բայց, չը նայելով գիւղա-
ցոց այդ չոռ ու ցաւին, իւրաքանչիւր տարի
այդ ժամանակ Եղի ամու հզօր ձայնը էլի
իւր նախկին վեհութեամբ «գրըմբում է» Գեօ-
լի զրադին: Տարուայ ընթացքում Եղի ամին
շէնամիջում շատ է զալմաղալի ճանկ ընկ-
նում, շատ է սրա, նրա հետ «գաւի-դրաբայ»
անում, բայց երբէք նա այնքան «ըողազ չի
ճղում», որքան խոտերի ժամանակ սարին:

— Ախալերք, դուք ինձանից ինչ էք ուզում,

¹⁾ Բաւականութիւն տայ: Ամափլամ ամք

— ասում է նա գիւղացիներին, — ես էլ ձեզ պէս
մի ըրհաթ մարդ ըստեղ իմ քեասիբութիւնին
եմ եկել. գանգատ ունէք, գնացէք ձեր ստար-
շինին արէք, ձեր սուդիին ասացէք: Եկել էք,
պկիս չոքել, ուզում էք հոգիս առնել. եա
կամ ինչ իրաւունքի տէր եմ ես, որ ձեզ քար-
սազի անեմ: Ոնց մեծը նշանց է տալիս, ես
ընհէնց եմ բան բռնում, ընհէնց եմ բաժին
անում: Մեծի խօսքէն դուրս չեմ գալիս.
ստարշինն ասում ա. «ա Եղ, էս բանն էսհէնց
արա», ես էլ վեր եմ ունում նրա ըսածին
անում: Դէ հմի դուք ինչ էք երեսս կտրել.
ինչ էք հոգիս բողազս հւաքել:

— Հա ես էդ անմեղ ջանիդ մատաղ, —
հեգնութեամբ նկատում է նրան Բաղունց կա-
րապետը, — մեծի խօսքաւն ես գնում: Լաւ
մեծը քեզ թաղի, մեծը քեզ ասել ա, թա
գնա բոլոր խոտերը շենամիջի դուրդերին տուր
ու խեղճ, անճար, անիլլաջ ըռհատին մաղ-
բուն արա: Խիչ չես հանգին բան բռնում, խիչ
չես մեզ հետ էլ մասլահաթ անում:

— Ի՞նչ, ի՞նչ. քեզ հետ մասլահաթ ա-
նեմ, քեզ հետ. շենս խի քանդուել ա, էլ
մարդ չի կայ:

— Բա ում հետ անես. եկ ինձ հարցրու,
գնա Խալիանց Դաւթին հարցրու: Են խի բա

Խարջը վեր դնելիս լոխից առաջ՝ մեզ պէս
քեասիբներին ես վեր դնում, պրիստաւ եկած
ժամանակ զազախին իր ձիով իմ տունս ես
զոնաղ տալիս: Որ սովիստաւ բան բռնէիր, է-
սօր Սարգիս-բէգի թուրքերը խեղճ Դաւթին
թակիլ-կտրատիլ չէին, նրա գլուխն ու շորե-
րը պատուատիլ չէին:

— Հա հլէ սպանած պտին, — պատասխա-
նում է Եղի ամին, — նա խի ա գնում Ցուրտ
աղբը ձորը, քանի որ ընտեղ բաժին չունի:
Որ հախը հարցանես, նա խսկի մի ծեղ էլա
չը պիտի ստանայ էս սարէն. նա քանի գըլ-
խանի ա, որ գնում ա Սարգիս-բէգի մարդ-
կանց հետ հուջաթ¹⁾ անում:

— Ո՞նց չի պիտի մի ծեղ էլա ստանալ,
տնաքանդ, — երեսը արնաթաթախ ու պատ-
ռոտած շորերով առաջ է դուրս գալիս Խալ-
իանց Դաւթիթը, — խի ես թագաւորի ըռհաթ
չեմ, ես թագաւորին խարջ չեմ տալի՛: Ա
Խալիսը, — գառնում է նա գիւղացիներին, —
բա էս Աստուած վեր կունի՛, էս տեսնուած
ու լսուած բան ա, ձիւն ձմեռուանիս Ցիրա-
լօվի հանգին սոված-ծարաւ անծող եմ արել,
վայ էն հալին քսան մանէթ սաղացրել ու

¹⁾ Վիճում:

խարջս տուել։ Հեռու ամառ էլ էս քեօփակն ու ստարշինը եկան պկիս չոքեցին, թա ըլիլ չի, որ պէտք ա հէնց հիմա խարջը տաս ու տաս. աղաչեցի պաղատեցի, որ մի քիչ ժամանակ տան, տեսնամ ինչ հողն եմ գլխիս տալի, — զատ չի դառաւ. ճարս կտրեց, իմ աչքի լիս Զէյրան կովը հէնց էս քեօփակի վրայ կիսագնով ծախեցի ու խարջս տուայ, հմի Սևունց Եղին ասում ա, թա դեռ սպանած պտին։

Սպանած պտին մի տակաւը, մին գլխաւը, կրկնում է զայրացած Եղի ամին, — ես քեզ ծուրտ աղբը ձոր եմ նշանց տուել, որ գնցել ես ընտեղ խոտ հնձելու, հը։

— Բա ինչ ես արել, բա ինչ ես արել. էս ինչ ա, — ցոյց է տալիս Եղի ամուն ծեղը, բաժանաթուղթը, — էս ինչ ես ձեռիս դրել։ Ծեղումը ծուրտ աղբը ճանպի տակը մեր բաժնի վրայ ես դնում, ճանպի գլխի ձորամիջի կատաղած խոտերը քո գիտացած մարդկանցը տալիս ու լետոյ նրանց սովորցնում, որ գան գլուխներս թակեն ու ճանպի տակն էլ ձեռներիցս խլեն։

— Սուտ ա, խաչաւ աւետարանաւ որդիմ կուտեմ, որ սուտ ա. ճնպի տակն էլ, գլուխն

էլ նրանց ա տուած, աչքերս կապիը մի, — ասում է Եղի ամին։

— Ո՞նց ա սուտ. ես չեմ գիր գիտում, տէր-Պետրոսի տղէն էլ չի գիտում, նա չի երեկ կշտրներիս կարգաց։ Դէ հմի էլ հազուր հրէս Արշակն ա ըստեղ, թող սա էլ կարգայ — ասում է Դաւիթը, դուրս քաշելով խմբից Արշակին։

— Արշակ, կարգա, Արշակ, կարգա, — ձայն են տալիս այս ու այն կողմից գիւղացիները։

Արշակը վերցնում է բաժանաթուղթը. «Սղաջանի տափերը, — կարգում է նա, — Այ-թալէն, Փխակի աղբեկը, Կէնդ-գումի ձորի բողազը, Հանէսսի տղի խմհատը, Բարսեղի իւր-դը, Վանունց ծրբհափան հողի նիրնիկ ըռե-վելը, Քիքունց խմհատի դուրս գցիլի ըռեվե-լը, գէնը հարերդայ չուայ Թրոսանց երկու-թեր ներքի եղնածիրը, Սերոքի կլատեղը ու ընտղա բոնած չուա Սահակ, խոթարքը, Յուրտ աղբը ճնպի տակը»։

— Ճնպի տակը, ճնպի տակը, — կրկնում են գիւղացիները, ընդհատելով Արշակի ըն-թերցանութիւնը. Բաղունց Կարապետը բար-կացած մօտենում է Եղիին։

— Ա՛ քեօփակ, դու մեր տները խի՞ ես քանդում, — ասում է նա, — մեզ քսան տանով

Կալի հողումն ես մաղքուն արել, ըստեղ էլ
էս խեղճին երեսուն տան հետ ես գցել ու
ոչ թա մենակ առանց խոտ թող արել, այլ
գեռ թակիլ էլ տուել: Ծեղումը մի բան ես
գրում, Սարգիս-բէգի թուրքերին ուրիշ բան
սովորացնում ու գալիս մեր կշտին էլ դամ-
միշ¹⁾ ըլում, թա տեղովը սուտ ա, բա քեզ
Աստուած չունիս, բա էն կապիտիցն²⁾ էլա
վախում չես:

— Ատա կապիտը քու գլխին փուլ գայ, —
բարկացած գոռում է Եղի ամին, — նա խի էր
ճնալի տակը գնում, որ թակուի: Են եքալ
աշխարհը դրանց բաժնումը, դա կարաց ոչ
ուրիշ տեղ վեր ունի:

— Ահք էն եքալ աշխարհը երեսուն տան
ես տուել, մենակ նրանը չի: Էլ ախիրը նրա
պէս մի խեղճը ճնալի տակը չը պիտի գնար,
էլ ախիրը նրա պէս մի խեղճը թակուիլ չի
պտէր: Դաւիթը ոնց անի, որ դու Սարգիս
բէգի թուրքերին ասում ես. «Ծեղումը ճնալի
տակը նրանց եմ տուել, ամա ով գայ, տազ
արած³⁾ գլուխը թակեցէք. Յուրա աղքը
ձորը հարերդա Սարգիս-բէգինն ու ստարշի-
նինն ա»:

1) Ուրանում: 2) Երկնբից: 3) Առև կացած:

— Ատա թուրքերը դեռ քեզ էլ պտին
թակած, քեզ. էդ ի՞նչ ես խօսում. ում վրայ
ես ըռեխ բաց անում: Դեռ եկ ձեռքս պաչի,
որ քեզ Կալի հողն եմ ուղարկել:

— Ում ձեռ պաչեմ. քու ձեռը: Դու ոչ
ըլես, ոչ, դու մեր շինէն իքի բաշը¹⁾ վե-
րանաս. քու անունը միանգամից Աստուածա-
նից կտրուի, քու:

— Ամէն, — վրայ են բերում գիւղացի-
ները:

— Ամէն ցաւա գաք դուք, — բարկացած
դառնում է դէպի նրանց Եղի ամին, — դեռ
ամէն էլ ասում էք. էդա ձեր շնորհակալու-
թինը: Ես տարին բութիւն ձեզ համար պրիս-
տաւի, նաշալնիկի ու մրօվի սուդի գռներն
ընկնեմ, գբոնատի ու ակոօժնի սուդի առա-
ջին չքչոք անեմ, յօգուտ հասարակաց երբեմն
գլուխս թակել տամ, ետնալ դուք ինձ ըտ-
հէնց էլ ասէք:

— Ա՛յ ոչ ընկնես, փուչ ընկնես, — խօ-
սում է Վարանանց Թունին. — խի ես ընկ-
նում, քեզ ով ա խնդրում, թա սրա-նրա դըռ-
ներն ընկի: Որ դու ըլես ոչ մեր շէնը կը
դինջանայ, քեասիւի բեռը կը թեթևանալ.

1) Ցաւիտեանս:

լաւ խեղճ ըռհաթի տունը դու չես քան-
դում, հը:

Այ իմ խէվ խելքէն, իմ խէվ խէլքէն,
որ ձեզ հետի քաշքաշ եմ ըլում: Ես էլ մի
դալաթ էր, որ այս տարի արի, Սալգիս բէգի
ու ստարշինի խաթըլը չը կոտրեցի: Ես խի
ձեզ հետի խոտ բաժանեմ, խի հանդ բաժա-
նեմ, խի մեծաւորների դոներն ընկնեմ: Ախ-
պերք, բոլ էր, հերիք էր. օր էս ետը դուք
ձեր եարին ¹⁾ դարման արէք. հօ, հօ. ես էլ
շէնամէջ չեմ կոխիլ, եախէս իքի բաշը ձեզա-
նից թափում եմ, եախկ, — ասում է Եղի ա-
մին ու թքոտելով հեռանում գիւղացիներից:

Վերջիններս այս այն կողմն են ցրւում:
Նրանք գարձեալ անբաւական են: Եղի ամու-
փառաւոր հրաժարականը նրանց չուրախաց-
րեց. այդ խօսքերը Եղի ամուց նրանք առա-
ջին անգամը չեն լսում: Եղի ամին տարուայ
ընթացքում մի քանի անգամ թքոտում է ու
զզուանքով «եախկ» անում, բայց էլի պրիս-
տաւ եկած ժամանակը «ձեռաց աղի առաջին
բռնում է» իբրև շինի իշխան, ու այդպիսով
միամիտ տրեխաւորի կապը երբէք նրա ձեռ-
քից չի ընկնում, էլի թէ խոտ, թէ հանդ

¹⁾ Աէրքին:

Եղի ամու ձեռքովն է անց կենում, էլի ա-
մեն բանում նրա մատը խառն է լինում:

Օրը շաբաթ է: Գիւղացիներից շատերը
վերջացրել են խոտի հունձը, շատերը դեռ
կիսել էլ չեն, նայած Եղի ամին ում ինչ բա-
ժին է տուել: Իրիկնադէմին սարի ճանապար-
հը «զլլում է», թէ մեծ, թէ փոքր իրանց
«ալուխ-չուլուխը» հաւաքած շտապում են
տուն: Խոտ բարձած ձիաների ու ջորիների
ու քարաւաններին վերջ չը կայ: Զը նայած
որ գիւղացին միշտ մեծ սիրով ու ինամքով
է վերաբերւում դէպի իւր ամենահաւատա-
րիմ օգնականը, անասունը, բայց ալդ օրը
նա ուշ չէ գարձնում նրա ծանը բեռան,
շտապեցնում է. ծեծում է մինչև անգամ խեղ-
ճին, որպէս զի «հրէտին ժամին վրայ հասնի,
հրէտին Լուսաւորչի պատկերի առաջին լիս
կպցնի ¹⁾, ու հրէտին խաչ-աւետարան համ-
բուրի»:

Օրհնելի սոփ ²⁾ զառիվայրում ջորուն խոտ
բարձած, գերանդին ուսին դրած, գլուխը քաշ
գցած դանդաղ քայլերով գնում է ջորու ե-
ակեց մեր ծանօթ Խալիքանց Դաւիթը: Եր-

¹⁾ Մուլ վառի:

²⁾ Սեռ-լեռնագագաթ:

բեմն-երբեմն միայն բարձրացնում է գլուխը,
«թոշ» անում ջորուն ու կրկին, ընկղմուելով
իր մտքերի մէջ, շարունակում լուռ ու մունջ
քայլել։ Նրա ետևից ոչ այնքան հեռու մի
փայտ ձեռքին, մի ինչ որ եղանակ շվշուաց-
նելով, բոլորովին մենակ գնում տիրացու Ար-
շակը. նկատելով Դաւթին, նա աւելացնում է
քայլերը։

— Բարի երեկոյ, Դաւթիթ ամի, — ասում է
Արշակը, հասնելով նրան։

— Ա՛յ Աստուծու բարին քեզ, — պատաս-
խանում է Դաւթիթը։

— Հը խոտ շատ հնձեցի՞ր։

— Ե՛, որտեղից հնձեցի, տնաշեն։ Են
օրը հու դու ինքդ տեսար, ինչ հալի էի ես.
ջարդուած, կտրատուած սաղ օրը էլ կարացի
ոչ մատս բանի նի տամ։ Եքսի օրը վայ էն
հալին գնացի Ալթալէն. էնտեղ սրա, նրա ա-
ղաչանք անելով կէնդ երկու բեռը խոտ հա-
ւաքեցի։

— Երկու բեռը, — հարցնում է զարմաց-
մամբ Արշակը։

— Երկու բեռը, հա. մինն երէկի եմ
տուն տարել, մինն էլ էս ահմի եմ տանում։

— Բա ձմեռս առանց խոտի էդ ո՞նց պը-
տես անթէլ։

— Ոնց թա ոնց պտիմ անիլ. մի ջորի ու-
նիմ, մնէլ մի կով. ընէլ Սևունց Եղին կիսա-
գնով ծախել կտայ ու եախես կը թափի նը-
րանցից, ոնց պտեմ անիլ, ա քե մատաղ, —
պատասխանում է Դաւթիթը ու կրկին լոռո-
թեան մէջ ընկղմում։ — Թո՛շ, թո՛շ, — երբեմն
միայն ձայն է տալիս նա։



UTR STEPC

ՄԵՐ ՏԵՐԱԾ

Աստուած մեր տէրին հաստատ պահի իր
ժողովրդի համար, երկար կեանք ու փառա-
ւոր օրեր տայ նրան: Նա որ կայ—ինքը Մով-
սէս մարգարէն ա. բոյը երկար, թիկունքը
լայն, միրուքը մինչև գոտին է հասնում, իսկ
մազերը ծալ-ծալ իջնում են ու նստում ու-
սերի վրայ. լիքը լըկլըկում է¹⁾, գնալիս մի
աջ, մի ձախ է թեքում, յետեից նայելիս
այնպէս է թւում, թէ բոլոր ժամանակ «խա-
ղաղութիւն ամենեցուն» ասելով օրհնում է
չորս կողմի ժողովրդին: Երկար գաւազանը
ձեռքին, սաղաւարտանման մորթէ փտփախը
գլխին մեր տէրը երբ աչքիդ առաջն է դուրս
գալիս, կարծում ես թէ ինքը Լուսաւորիչն
ա Խորվիրապից դառնում. փափախդ վերցնում
ես կռան տակիդ դնում, ձեռքերդ կրծքիդ
խաչ անում, մօտենում առաջին թեքում ու

¹⁾ Տատանուում է:

«օրհնեա, տէր» ասում. «Աստուած օրհնի, որդի ջան», պատաշխանում է տէրը ու մի պահպանիչ կարդում գլխիդ։ Մեր տէրը այն ուսումնական շլապկաւոր քահանաների նման մինչև կէս օր քուն չի լինում. վաղ առաւօտեան, մինչև տաւարը հանդը գնալը, նա արդէն ոտի վրայ անգիր աղօթքներ է կարդում, կամ ինքն իրան շարականներ երգում։ Ժամկոչը հէնց որ բոնում է գանգակի թելը, տէրըն արդէն սրան-նրան «Աստուած օրհնի ասելով» եկեղեցու շէմքին է մօտենում։ Առաւօտեան ժամն ասելուց լետոյ տէրը եկեղեցուց դուրս է գալիս գիւղը շրջելու, մեզ, իր զաւակներին, ակը տալու։ Մինի վրայ բարկանում է, որ հրետին բանի գնալ, միւսին մի երկու գաւազանով խփում է, երբ դեռ մրափած է տեսնում, փոքրերին խրատում է, որ ծնողաց հնագանդ կենան, ինչ բանի նրանք ուղարկում են, անտրտունջ գնան, աշխատաւորին խրախուսում է ու օրհնելով ճանապարհ գցում դէպի դաշտը, — մի խօսքով տէրը ամբողջ գիւղը պարտում է, համարեա ամեն տուն մտնում է ու մի բարի խորհուրդ տալի կամ մի քաղցր խօսք ասում։ Նատ անգամ պատհում է, որ տէրը ոչ թէ մինչև կէսօր, այլ մինչև երեկոյ էլ իրանց տան երեսը չի տեսնում։

—Ատա իսկի տեսնում ա ինչ անի, իբենց տունը որն է, մեր տունը որը։ Նա մեր տէրն ա, մեր տներն էլ, մեր ունեցած չունեցածն էլ նրանն ա։ Դէ կարելի՞ ա, որ մենք տէրին ամբողջ օրը սոված թողնենք, չէ, հայքը ստոնեալի ագաթում այդ չը կալ. այն տունն ու նրա միջի օջաղը նզովեալ է, ուր տէրը մի բան չը ճաշակի, օրհնութեան բաժակ չը խմի. մի տեղ մի բաժակ արագ է, միւս տեղ մի քեաշի գինի, մի այլ տեղ մի կտոր պանիր-հաց է կամ պասուց մի որ և է չոր ու ցամաք կերակուր։ Տէրն ամեն տեղ օրհնում է իր զաւակներին ու ինչ որ տալիս են, բաւական ա մնում, մինին հազար խնդրելով Աստծուց տան տիրոջ համար, ու դուրս գնում։ Պատահում են օրեր, որ տէրը այս կամ այնտեղ ճոխ սուփրի է պատահում, մի բաժակ արաղով ու պանիր-հացով փոր չի կըշտանալ. այդպիսի գէպքերում բոլորը ոտի են կանգնում ու տէրին ամենապատուաւոր տեղը նստացնում։ Երբ տէրը նստում է, այն ժամանակ սուփրի տէրը նա է, միւս բոլորը նրա խոնարհ ծառաներն են. Մեր տէրը սովորութիւն չունի ուսումնականների նման մերժելուրիշի աղ ու հացը. նրանց, երբ ասում ես պատահած ժամանակ. «վարժապետ, կամ՝ ա

տէր, եթէ տէրտէր է, համեցէք, համեցէք,
ուր էք գնում»։ ասում են՝ «չէ, չէ, շնորհա-
կալ ենք, մենք քելեխ չենք ուտում», կար-
ծում են թէ հետ ամեն սուփրի վրայ հոգե-
հաց ա փռած, որի հետ նրանք առհասարակ
չունին։ Ասենք Աստուծ նրանց բարի տայ,
որ ամեն ժամանակ սուփրի չեն մօտենում.
ուսումնական մարդիկ են, պէտք ա լաւ պա-
տիւ տաս, հաւ ա, ճիւ ա պիտի մորթես,
եղը-մեղը պիտի ուտացնես. թէ չէ ուրիշ
կոշտ ու կոպիտ բաներից մէկ էլ տեսար հի-
ւանդացան, շկօլն առանց վարժապետի մնաց,
եկեղեցին առանց տէրտէրի։ Էս ու էն կը
հարցնեն, թէ այդ ինչ է պատահել, որ վար-
ժապետն ու տէրտէրը հիւանդացել են. կա-
սեն, որ այս ինչ ախմախի տանը լօբի ու
շըլքիլաւ են ուտացրել, նրանից են հիւան-
դացել, — դէ արի այն ժամանակ էշը փխակի-
ցը հանի։ Այն ինչ մեր տէրի առաջին դիր,
ինչ որ ուզում ես. մեր երկրում ծնուած,
մեր երկրում մեծացած մարդ է. մոխոխ, լո-
բի, կոնչոլ, խաշու, բոխ, շուշան, — բոլորը
նրա համար եղը ու մեղըն է. «այս բանը ես
չեմ ուտում, կամ այս բանը ես չեմ սիրում»,
նրանից երեէք չես լսիլ։ Միայն մի բանի մեր
տէրն աչքով աչք չունի նայելու — այդ էգի

միսն է, որին նա իրան Աստծուն նուիրելուց
յետոյ մատով անգամ չի դիպչում. այդ պատ-
ճառով երբ մսեղէն կերակուր դնես տէրի ա-
ռաջին, միշտ կը հարցնի՝ «Եգ ա, թա վերց»։¹⁾
«Վերց ա, ա տէր, վերց, կարգիդ մատաղ, կեր
ու փառաւորվիր», պատասխանում ես. տէրը
ճաշակում է ու օրհնում քեզ։

Մի անգամ, չեմ իմանում ում տանն էր,
ժամահացի միջոցին, երբ խաշուն բերան, տէ-
րը սովորաբար հարցրեց՝ «Եգ ա, թա վերց»։
Մուսունց Մնացական ապէրը, որը նստած էր
տէրի դիմաց, իր սովորական զուարձախօսու-
թեամբ պատասխանեց. «Հա, Եգ ա, Եգ ա,
կեր բալքի²⁾ քեզ սպանի։ Տէրը, սովոր լի-
նելով Մնացական ապօր հանաքներին, միայն
բարձրաձայն ծիծաղեց. այն ինչուսումնական
տէրտէրը ով ա իմանում այդպիսի հանաքի
պատճառով ինչ զալմաղալ բարձրացնէր ու
հացը գլխներիս հարամ անէր։

Ճշմարիտն ասած Մնացական ապէրը տէ-
րի հետ այնքան էլ չունի։ Ի՞նչ արած. նրան
ներելի է, մեծ մարդ ա, պառաւել ա ու խել-
քից ընկել։ Գուցէ կարծում ա, որ ինքն իբրև
մահտեսի տէրից բարձրն ա. ինքը երուսաղէմ

1) Արու։ 2) Գուցէ։

ա գնացել, տէրը ոչ. ինքը չոքչոք գետինը
լիզելով Քրիստոսի գերեզմանին ա մօտեցել,
տէրը ոչ. բա այն էլ իմանում ա Մնացական
ապէրը, որ տէրը Հայրիկ կաթողիկոսի աջն ա-
ռել ա, ինքը ոչ. տէրը սուրբազնների հետ
մի սուփրի նստում է, ինքը ոչ: Է՛, որն ա-
սեմ. Մնացական ապէրը ամեն կերպ աշխա-
տում է տէրի պատիւր գցել, բայց այդ նրան
չի աջողվում: Ասում ա, մի անգամ, երբ գեռ
տէրը գոմերում տաւար էր պահում, գալիս
է տուն գոմերը հաց տանելու: Մայրը տանը
չի լինում. տէրը դէս է ընկնում, դէն է ընկ-
նում, մի ուտելու բան չի գտնում, մտածում
է ձուածեղ անել. մառանի կողբէքը կոտրում
է, ներս մտնում, փափախը ձուաներով լցնում,
որ մինչև մօր գալն իր բանը տեսնի: Հակա-
ռակի պէս մայրը այդ ըոսէին գալիս է ու
տէրին մառանումը տեսնում: Ոնց անի, ոնց
չանի, որ մօր քօթակից ազատուի, տէրը փա-
փախը ձուաներով գլխին է դնում ու համար-
ձակ մօր առաջը դուրս գալիս: Մայրը, տես-
նելով նրան մառանում, սաստիկ բարկանում
է ու երկու ձեռքով տէրի գլխին բանփում.
ձուաները կոտրատվում են ու տէրի գլուխ-
մլուխը ու թուշերը նախշում:

Մի ուրիշ անգամ, պատմում է Մնացա-

կան ապերը, հայրը գոմերից ուղարկում է
տէրին տուն իր մուշտակի ետևից: Տէրը մուշ-
տակը ուսին դրած գոմերը դառնալիս ճանա-
պարհին սաստիկ լոգնում է. առանց երկար
ու բարակ մտածելու վերցնում է մուշտակը
իր ուսերից ու իրանց ահագին Քօնթի շան
մէջքին բարձում, այնպէս որ շունը կորչում
է մուշտակի մէջ. այդ գեռ բաւական չի, հա-
ցի տոպրակն էլ պնդացնում է մուշտակից,
լաւ կապկապելով նրան: Հէնց որ տէրն ու
Քօնթին գոմերն են հասնում, այնտեղի շնե-
րըն, իրանց բարեկամ Քօնթիին մուշտակի
մէջ չը ճանաչելով ու նրան մի օտարօտի գա-
զանի տեղ ընդունելով, կատաղաբար յարձակ-
ւում են վրան ու սկսում է սարսափելի քօ-
լոլ: Տէրը ձեռքի մհակով սկսում է նի պրա-
նել շներին, բայց ոչինչ չի կարողանում շի-
նել. շները մուշտակը մաս մաս են պատա-
ռոտում ու տոպրակի հացը մաքրազարդում.
խեղճ Քօնթին էլ հազիւ է նրանց ատամնե-
րից պրծնում:

Այս գեռ բաւական չէ, Մնացական ապօ-
րը որ լսես պատրաստ է օր ու գիշեր տէրի
կեանքից հազար ու մի խայտառակ բան պատ-
մել: Քուրքի լուրը գոմերը հասաւ, ուր գտն-
ում էր այդ ժամանակ տէր հայրը: Տաւա-

բածներից մինը, գալով գիւղը, յատուկ գնաց
տէրի մօտ ու ասաց. «ա տուն կրակ ընկած,
հրետին փախի դադագիւն ընկի¹⁾ թէ չէ հայ-
րը գալու ա քեզ սպանի»: Տէրը հէսց այդ-
պիսի մի բանի էր սպասում, որ թողնի տուն
ու տեղ ու դադարգիւն ընկնի. իրա գնալու
տեղը նա վաղուց գիտէր: Հօր գալու լուրն
առնելով, նա հետեւել օրը վաղ առաւօտեան
վեր կացաւ, մի հաց աղլուխում փաթաթեց,
մէջքին կապեց և գնաց: Նա փախաւ, գնաց
Ծաղկոց անապատը այնտեղ հռչակաւոր Յով-
հաննէս հայր սուրբի մօտ կարդալու ու դըպ-
րութիւն սովորելու, որ վերջը քահանայ գառ-
նալի: Ծնողները մի երկու շաբթից յետոյ ի-
մացան ուր ա փախել տէրը, բայց ետեւից չը
գնացին. աւելի լաւ համարեցին թողնել այն-
տեղ, քանի որ նա տանը աւելի վնաս էր տա-
լիս, քան օգուտ: Անապատումն էլ, Մնացա-
կան ապօր ասելով, նա շատ բան չը շինեց.
գրաբարի հոտը վայ էն հալին առաւ, իսկ
«այիբ-բէնից» և առհասարակ կարդալ գրելուց
բորիկ մնաց: Նրա սովորած գրաբարն էլ Աս-
տուած ինքը գրաբար համարի: Խեղճ հայր
սուրբը շատ աշխատեց, ամա տէրը էլի այն

1) Կորիր:

տաւարածը մնաց: Մի անգամ սրբազանը Ծաղ-
կոց հիւր է գալիս: Հայր սուրբը տէրին նրա
մօտ սպասաւոր է նշանակում: Մի քանի օ-
րից յետոյ վանքից հեռանալիս ի միջի ալոց
ասում է հայր սուրբին. «Յովհաննէս հայր
սուրբ, գիտեմ, որ փոքրաւորիդ քահանայու-
թեան համար ես պատրաստում. նա բաւա-
կանին համեստ ու խոնարհ է, բայց գեռ շատ
գուեհիկ է, աշխատիր նրա լեզուն փոքր ինչ
կոտրել, գրոց լեզուի հետ ծանօթացըու»:
Սրբազանի գնալուց յետոյ հայր սուրբը սաս-
տիկ յանդիմանում է տէրին ու խստիւ պա-
տուիրում, որ նա իրա, հայր սուրբի հետ,
միշտ գրաբար խօսալ: «Ծառայ եմ կամքիդ,
հայր սուրբ», պատասխանում է տէրը և ըս-
կըսում է այնուհետև հայր սուրբի հետ գրա-
բար կոտրատել: Բայց շուտով պատահում է
մի դէպք, որը վերջ է դնում գրաբարի յա-
ճախ գործածութեան: Մի օր վաղ առաւօ-
տեան դեռ մուտքը պատաճ տէրն ըստ սովո-
րականին գնում է մօտակայ անտառը շալա-
կով փայտ բերելու: Վանքի պարսպից դեռ
մի քանի քայլ չը հեռացած, մօտակայ ժայ-
ռի վրայ մի ինչ որ բան է նկատում, մօտե-
նում է և ինչ է տեսնում — հայր սուրբի սի-
րելի աւանակի արիւնաշաղախ ոսկորներն այս

ու այն կողմը ցըռւած. Տէր, մեղայ քեզ Աստուած. սա ի՞նչ բան է, տէրամեռ գալին այս ի՞նչ է արել, — բացականչում է տէրը ու հարա տալով դէպի վանքը վագում։ Հայր սուրբը տէրի այլալուած դէմքը տեսնելով, հարց նում է շտապով. «Հօր, ինչ է պատահել, որ դի ջան, ասմա»։ Տէրը այդ նեղ սհաթին էլի գրաբարով է խօսում։ «Հայր սուրբ, — զլեռնային ծաղկակոխը¹⁾ ի գիշերէ այսմիկ եկեալ ու ի վերայ ժայռի պատռեալ ու մաքրազարթեալ է զորովայնը մոխրաթաւալի²⁾ մերոյ»։ — «Ա՛ որդի, ի՞նչ, ի՞նչ, — ասում է հայր սուրբը, — շիտակ ասմա, չեմ հասկանում»։ Տէրը ձեռաց աշխարհաբարի է փոխում ու պատասխանում. «Դէ ո՞նց շիտակ ասեմ, հայր սուրբ. գիշերիս գալլը եկել ա ու մեր իշի թափանմափանը³⁾ ցըրւ տուել»։ Հայր սուրբը սաստիկ բարկանում է տէրի վրայ, որ նա երեկոյեան էշին տխոռատանը չի կապել, զայլացած անիծում է ու ասում. «շուն անիծած, եթէ այսուհետև էլ գու ինձ այդպիսի գրաբար խաբարներ պիտի բերես, հրետին իմ անպատից քո փասափուսէն քաշի՝⁴⁾։ Տէրը

¹⁾ Գայլը; ²⁾ Էշի; ³⁾ Փորը, ստամբուլը;
⁴⁾ Գնա՛, կորիր։

ծնկաչոք թողութիւն է խնդրում։ Բարեսիրտ հայր սուրբը ներում է։ Եւ շատ դժուար էր նրա համար իր փոքրաւորին թերուս դուրս անել վանքից. տէրը լաւիտեան տգէտ կը մնար. էս ու էն կը հարցնէին, գուցէ և հէնց ինքը սրբազանը, այս քահանայացուն ում աշակերտն է. — Յովհաննէս հայր սուրբի։ «Ե՛, ծերացել է Յովհաննէս հայր սուրբը, կասէր սրբազանը. նրա փոքրաւորներն առաջ շատ հմուտ ու բանիմաց էին, իսկ այժմս անտաշ ու թերուս են»։ Վերջ իվերջոյ խեղճ հայր սուրբը ու երես կը մնար։ Ճար չը կար, հայր սուրբը վճռեց դարձեալ տէրին թողնել իր մօտ ու շարունակել նրա կրթութիւնը։ Շատ աշխատեց հայր սուրբը, ամա տէրը գրել-կարդալը մի շիտակ չը մարսեց։ (Մի էդ Մնակորդալը մի շիտակ չը մարսեց։) Մի էդ Մնական ապօրը հարցնող ըլի, թէ ինքը Յովհաննէս հայր սուրբը իւր ամբողջ կեանքումը գրել-կարդալը մարսել է, որ նրա աշակերտը մարսի)։ Ճար կարած հայր սուրբը «ալիբ-բէնարանը» թողեց ու սկսեց տէրին անգեր աղօթքներ, շարականներ, սաղմոս ու մինչև անգամ աւետարան սովորեցնել։ Ալդպէս մի քանի տարի անցաւ մինչև որ տէրի միրուքն եկաւ կլծքի վրայ նստեց։ Այդ միջոցին տէր-Մինասը վախճանուեց։ Գիւղիս իշխանները

ժողովրդի կողմից մի խնդիրք ուղարկեցին սըլբ-
բազանին, որ նա տէրին ձեռնադրի: Սըլբազա-
նը պատասխանեց, որ մի ուրիշ ուսումնական
քահանայացու ունի, նրան է ուզում ձեռնա-
դրել ու մեր գիւղն ուղարկել: Իշխաններն
այս որ լսեցին բոլորն էլ գնացին քաղաք սըլբ-
բազանի մօտ. Նրա խաթրն առնելու համար
մի քանի հաց մեղք, կարագ, մի մոթալ պա-
նիր, մի փայտենի ալծ ու բախրա ¹⁾ սպանած
տարան իրանց հետ: Երբ իշխաններին ընդու-
նում է սըլբազանը, նրանց մէջից դուրս է
գալիս Բալունց Սալին ու ասում. «սուրբազան
հայր, թա մեր Առուշանին տէր ես շինում,
շինի, թա ու չէ էլ ուրիշ երէց չենք թող-
նիլ, որ մեր շէնը մտնի. էլ ոչ պըտարագ
կանենք, ոչ ժամ կը գնանք»: Ի՞նչ պիտի ա-
նէր խեղճ սըլբազանը. Հրամայում է, որ Զատ-
կից յետոյ Առուշանին իր մօտ ուղարկեն ձեռ-
նադրելու: Զատիկն անցաւ թէ չէ, Առուշա-
նը ճանապարհ ընկաւ քաղաք: Իշխանները
խնդրեցին Յովհաննէս հայր սուրբին, որ նա
էլ Առուշանի հետ գնալ քաղաք, այնտեղ աշ-
խատի, որ քննութեան ժամանակ Առուշանը
սկերես չը մնայ. հայր. սուրբը գնաց, բայց

¹⁾ Եղջերու:

յետոյ շատ փոշմանեց: Քննութեանը Առուշա-
նը վայ էն հալին մի քանի աղօթքներ է բե-
րանացի կարգում ու քանի շարականներ եր-
գում, բայց երբ բանը հասնում է աւետա-
րանին, խեղճը բոլորովին գլուխը կորցնում
է: Քննութիւն անող քահանաներից մինը հա-
կառակի պէս մի բոլորովին անձանօթ գլուխ
է բաց անում աւետարանից ու առանց կար-
գալ տալու սկսում հարցնել. «ցոյց տուր, տի-
րացու, այս երեսում «այլը» որն է, «բէնը»
որն է և ալին: Առուշանը համարձակ բոլոր
տառերը ցոյց է տալիս, բայց երբ հերթը հաս-
նում է «նին» սաստիկ շփոթւում է, դէս ու
դէն է ընկնում, զատ չի դառնում: Հայր սուր-
բը, տեսնելով, որ բանը խարաբ ա լինում,
իսկոյն մէջ է մտնում. «Որդի ջան, — ասում է
նա, — թա չես յիշում «նուն» ուր ա: (Նայը
սուրբը դեռ վանքում եղած ժամանակ Առու-
շանին ասած է լինում, որ «նուն» հէնց ա
թա աղբանցում պըլպած շուն լինի): Քեզ
հարցնում են, — շարունակում է հայր սուրբը,
— «նուն» ուր ա, «նուն» ուր ա: — «Նայը
սուրբ, Էնա հրէ աղբանցում պըլպած» պա-
տասխանում է մեր Առուշանը, բոլորովին
գլուխը կորցրած, մտաբերելով հայր սուրբի
համեմատութիւնը:

Ե՛, Մնացական ապօր պատմածի որ մէկն ասեմ: Նա մեր տէրի աչքի տակիցն է կալել, բայց ոչինչ չի կարողանում շինել. Էս ու էն պատի տակին նստած բամբասում է, ուրիշ ոչինչ: Երկու երեսանի մարդ է. տէրին առանց «օրհնեա տէրի» երբէք չի հանդիպում, միշտ բերնում պատրաստ ունի այդ խօսքերը: Երբ տէրին պատահում նրանց տունը գնալ, Մնացական ապէրը քիչ է մնում նրան պատուելու համար տան կթի կովը մորթի: Ի՞նչու. որովհետեւ տեսնում է, որ տէրը մեր երկրի, մեր հողի մարդ է, մեզ հետ եօլա գնալն իմանում է: Ասացէք, խնդրեմ, մի ուրիշ քահանայ ալսպիսի դէպքն առանց զալմաղալի կը թողնէ: Չունամանց Ասրի տանը կնունք է լինում: Երբ տէրը կնքաւորով, տիրացուով ու հիւրերով ներս է մտնում, տեսնում է տան մէջ տեղը կապերտի վրայ Չունամանց Բողար շունը փառաւոր նստած. տէրամեռն իսկի տեղից չի շարժւում. բոլորն էլ մնում են կանգնած: Այդ միջոցին ներս է մտնում Ասրին ու, տեսնելով բանն ինչումն է, դառնում է Բողարին հետևեալ խօսքերով. «ա զուն, վեր կաց, տէրը նստի. ա, սատկած, քեզ հետ չեմ, վեր կաց, տէրը նստի. հրէ, հրէ. հրէ, տէրամեռը կապերտի վրայ հէնց

նստել ա, կասես թա տէրն ինքն ա, ըախին ինքն ա կնքել»: Բողարը վեր է կենում, եր փասափուսէն քաշում: Տէրը հիւրերի հետ նրա տեղը ծալապատկում է, սկսում է ուտել, խըմել ու Ասրիի տուն ու տեղն օրհնել:

Մի ուրիշ անգամ տէրը Աղունց տունն է գնում տնօրհնէքի: Յայտնի է, որ Աղունք շատ կոշտ ու կոպիտ մարդիկ են, մանաւանդ նրանց Սահակը: Երբ տէրը ներս է մտնում, մահի տարած Սահակը իսկի տեղից չի շարժւում: Տէրը նրա ինչ պտուղ լինելը լաւ իմանալով, ամենսին բան չի ասում: Երբ տունն օրհնում է, Սահակի մայրն ուզում է տէրին մի բանով պատուել, ուստի հրաւիրում է նըստել. բայց արջ Սահակը ամբողջ կապերտը բռնած չի էլ մտածում տեղից շարժուել: Մայրը, այդ նկատելով, քաղցրութեամբ դառնում է նրան և ասում. «ա Սահակ. քե մատաղ, վեր կաց, տէրը նստի»: Սահակը մօր երեսին վեր կաց, տէրը նստի: «Սահակ ջան, վեր կաց, տէրը նստի», — կըկնում է մայրը. Սահակը դարձեալ մնում է անշարժ: Երբորդ, չորրորդ անգամ կըկնում է մայրն իր խնդիրքը. վերջապէս Սահակը կանգնում է տեղից, քալերը դէպի դուրս ուղղում ու իր սովորական կոպականութեամբ ասում. «հայ, իմ վեր կենալից ե-

տը տէրը չի նստի իմ տեղը մի ու շուն
նստի»:

Սահակը յալտնի արջ է. նա իրանից ոչ
մեծ է ճանաչում, ոչ փոքր: Տէրը նրանից չի
նեղանում. նստում է Սահակի տեղն ու մեղ-
րով ձուածեղ անուշ անում:

Ասենք առաջին անգամը չի Սահակը տէ-
րի հետ այդպէս վարւում. տէրը լաւ սովոր է
նրա կոպտութիւններին: Մի անգամ Ադունց
տանը կնունք է լինում. տէրը երեխալին երբ
եկեղեցուց բերում է, տունն օրհնելուց յետոյ
ըստ սովորականին՝ դառնում է երեխալի մօրը,
Սահակի մեծ եղբօր կնոջն ու ասում. «ասա՛
բուրվառ», կինը կրկնում է՝ «բուրվառ», «իմը
տուր, քոնն առ», — պատասխանում է տէրը,
այսինքն՝ կնքադրամը տուր, երեխալիդ առ:
Սահակն այդ միջոցին մօտենում է տէրին ու
ասում. «ա տէր, դէ դու էլ ասա՛ քահանայ»:
Տէրը կրկնում է՝ «քահանայ» — «Հոգիդ առնի
մի ու սատանայ», — պատասխանում է Սահա-
կը: Տէրը փոխանակ բարկանալու, բարձրածայն
ծիծաղում է, հիւրերը հետեւում են նրա օրի-
նակին ու կնունքն ուրախ, զուարթ անց է կե-
նում:

Մեր տէրը մեծի հետ մեծ է, փոքրի հետ
փոքր. դատարկ բաներից նա չի նեղանում

Երբէք. շատ որ բարկացնես, հօրդ կանիծի,
մօրդ կանիծի, թէ խմած լինի, մի քանի թունդ
խօսք կասի: Ամա բաւական ա, որ փափախդ
վերցնես, մօտենաս աջն առնես, որ ամեն բան
մուանայ ու «Աստուած թողութիւն զնորհի»,
որգի ջանս ասի ու գլխիդ մի պահպանիչ կար-
դայ: Տէրը իր ժողովրդի հետ ամեն բանում
եօլա գնալն իմանում ա. եկեղեցում գանձա-
նակ հաւաքելիս թաբախի մէջ փողի տեղ պա-
տահում է մի զոյգ մեխ, կամ մի եշի նալն
ես գցում. տէրը չի նեղանում, օրհնութեամբ
ընդունում է: Նա էլ մարդ ա, նա էլ տուն
ու պուճախի, հանդ ու հայվանի¹⁾ տէր ա,
նալն ու մեխը նրան էլ են պէտք գալիս:
Զրօրհնէքին ու Զատկին տէրը գալիս է տու-
նըդ օրհնելու, քեասիբ²⁾ մարդ ես, պատա-
հում է որ գրպանումդ մի կոպէկ անգամ սև
փող չը կայ, ասում ես. «ա տէր, կարգիդ մա-
տաղ, մի քանի շահի սև փող կար ձեռքիս, այն
էլ գրագիր Մինասն առաւ անցեալ տարուայ
իր գրած մի խնդրքի համար: Այս իմ տունն,
այդ դու. տանով ու տեղով լոխ քոնն ենք,
ինչ քէֆդ տալիս է, վեր առ հետդ տար»:

¹⁾ Անասունի: ²⁾ Աղբատ:

ճուտ է վերցնում, կամ մի պուլիկ իւղ ու
Աստուծոյ օրհնանքը գլխիդ թափելով տնիցդ
դուրս է գնում:

Ամեն ցաւի, ամեն պատուհասի մեր տէ-
րը միշտ վերահասու է լինում: Պատահում է
կովդ կորչում, սար ու ձոր չափում ես, բան
չես գտնում. գնում ես տէրի մօտ երկու ձեռ-
քով աջը բռնում, համբուրում ու առաջն
խոնարհում: «Ա՝ տէր,—ասում ես—իմ տունն
ու տեղը, քուլփաթս ու օղլուշաղս քեզ զուր-
բան, կովս կորել ա, Կիլ-կապ արա, հէնց որ
գտայ, մի գառը մատաղ կանեմ, հէրին ¹⁾,
մորթին, գլուխն ու ոտքերը քեզ կուղարկեմ»:
Տէրը ձեռաց թուղթ ու ղալամը ձեռք է առ-
նում ու Աւետարանի վրայ Կիլ-կապ անում:
Աստուծուն փառք ես տալիս ու գնում հան-
գիստ քնում. գիտես, որ տէրի կիլ-կապից ե-
տը գալի ուեխը ²⁾ բաց չի լինիլ, անիրաւը
սովից պատառ-պատառ կը լինի, ամա կովիդ
մի մազին անգամ չի կարող դիպչել:

Երբէք չեմ կարող մոռանալ տէրի կատա-
րած հետևեալ հրաշքը: Մի անգամ մեր Զէր-
ան կովը իր հորթի հետ կորել էր: Տէրը կել

¹⁾ Աջ կողմի թիակը:

²⁾ Բերանը:

կապ արաւ: Մի ամբողջ շաբաթ մենք էլ տեղ
ըլ թողինք, ման եկանք. զատ չի երևաց.
վերջը գտանք Զէրանին Աւագանայ աղբերի
ձորում իր հորթի հետ հանգիստ արածելիս,
իսկ նրա մօտ երկու գայլերի անշնչացած դիակ-
ներ ընկած: Դէ, եթէ մեր տէրի կիլ-կապը ըլ
լինէր, ալդպիսի հրաշք կը պատահէր: Մնա-
ցական ապէրն ասում ա, որ այդ Զէրան կո-
վի պողերի հունարն էր, այլ ոչ թէ տէրի
կիլ-կապի. բայց յալտնի է արդէն, որ նա խել-
քից ընկած ծեր մարդ է. նրա խօսքերին ով
է ուշադրութիւն դարձնում:

Մորեխի ու մկան տարի է պատահում:
Տէրն արգեօք մի բոպէ հանգիստ ունի. ոչ:
Խաչն ու Աւետարանը ձեռքին, մէր ու մա-
նուկ ետևից գցած դաշտ է դուրս գալիս, էս
խաչի էն խաչի մօտ թափօր անում, Աստու-
ծուց գժութիւն և ողորմութիւն խնդրելով
մեզ համար: Երբ տէրը հեկեկալով երգում է
«Օրհնեսցի և նախախնամեալ պահեսցի այս
նշանաւս, սուրբ խաչիւս և սուրբ Աւետարա-
նաւս արևելեան կողմն աշխարհի», կանանց
աչքերից արտասուրքը հեղեղի պէս թափում
է, սուգ ու շիւանի ձայնը մինչև երկինք է
հասնում և Աստուած մեր աղաքանքը լսում
է: Թափօրը վերջանում է: Տէրը դառնում է

ժողովրդին և ասում. «Սիրելի ժողովուրդ. մուկն ու մորեխը Աստուծոյ ուղարկած պատիժ է: Ի՞նչու համար.—մեր մեղքերի: Տեսնում էք, գնալով նրանք բազմանում են. նըրանց ոչնչացնել մենք չենք կարող: Աստուծուց ուղարկած պատժին չը պիտի ընդիմադրես, այլ պէտք է նրա անունն օրհնելով կը ըստ պատիժին ու քաւես քո մեղքերը: Եթէ ընդիմադրես, երկնքից հուր ու կրակ կը թափուի աշխարհիս վրայ ու ամեն ինչ կը ոչնչացնի, ինչպէս այդ պատահեց Սոդոմ Գոմորի հետ: Արդար Յովել երբ զբկվեց աշխարհիս բոլոր բարիքներից, չը կորցրեց իր հաւատոն առ Աստուծ: Այդ բաւական չէր. նա սկսեց մարմնով փտել, գարշահոտութիւն տարածելով իր չորս կողմը, բայց նրա արդար հոգին չը կորցրեց իր մաքրութիւնը ապականուած մարմնի մէջ: Նա շարունակում էր փառաբանել Տիրոջ անունը և Տէրը նրան կը կին առողջութիւն ներշնչեց որից լետոյ առաքինի Յովել կրկին ձեռք բերելով իր բոլոր կրկին տէր դարձաւ կնոջ, զաւակների, ծոռների, ծուռների, հոտերի և ճախիրների: Ուրեմն սիրելիք, դուք էլ հետեւեցէք այդ արդար նահապետի օրինակին, միքարտնչալ, մի ընդիմադրէք Աստուծու պատ-

մին, այլ հեղութեամբ տարէք այս բոլոր պատուհասները. աղօթեցէք Աստուծուն, փառաբանեցէք նրան Որն է տէր երկնքի և երկրի, ծովի և աւազի, հանդ ու հանդաստանի, — մի խօսքով, բոլոր շնչաւոր և անշունչ արարածների: Նայեցէք վերև, այնտեղ երկնքում դրած է ոսկէ թախտը, որի վրայ բազմած են Հայր, Որդի և Հոգին Սուրբ, իսկ մեր Տէր Լուսաւորիչը նրանց մօտ կանգնած բարեխօսում է մեզ համար: Արտասուեցէք, աղօթեցէք, Խաչի և Աւետարանի առաջ ծունը չոքեցէք ու չոք-չոք մօտեցէք նրանց: Աստուծ կը լսի մեր լաց ու կոծն ու կրակ կը թափի ոչ թէ մեր գլխին, այլ նրանց, որոնք այսօր լափում են մեր ոսկեփայլ արտերն ու կանաչազարդ դաշտերը»:

Տէրը վերջացնում է իր քարոզը: Ճողովուրդը մօտենում է խաչն ու աւետարանը համբուրելու: Նատերն առնում են տէրի աջն ու աջահամբուր տալի: Տէրն օրհնութեամբ առնում է, ինչ որ տալիս են. նրա համար շատ ու քիչ չը կայ, նրա համար հարուստ ու աղքատ չը կայ, — բոլորը հաւասար են, բոլորը նրա ժողովուրդն ու հարազատ զաւակներն են: «Աստուծած շէն պահի իմ ժողովուրդը, — յաճախ կրկնում է նա, — հարուստն

իր գառը չի խնայում ինձ համար, իսկ աղքատն իր ճուտը: Տէրի համար ամեն տանը բաց սուփրայ կալ, ամեն տան մի բաժակ գինի կամ արադ է գտնվում նրանց հին ու նոր ննջեցելանց ողորմաթասը խմելու համար, կամ նրանց տունն ու պուճախն օրհնելու: Ե՛, Բնչ ասեմ էլ. Աստուած ժողովրդին պահի տէրի համար, իսկ տէրին ժողովրդի»:

Կան մարդիկ, որոնք բամբասում են, թէ տէրը չի վարում, չի հնձում, արտ ու արօտատեղի չունի, այդ պատճառով էլ ուրիշներին յորդորում է, որ մորեխին ու մկան չընդիմադրեն, որ Աստուած աւելի խիստ չը պատժի: Ե՛, ինչ ասեմ այդպէս ասողներին: Նրանք որ կան կոյր մարդիկ են, եկեղեցու շէմքը չեն ճանաչում, այստեղ-այնտեղ այիբրէնի հօտ են առել, էլ իրանցից մեծ չեն ճանաչում. տարին մի անդամ ամառ ժամանակ սպիտակ շլապկաներ գլխներին դրած թալակից փախած աղուէսների նման երևում են մեր մէջ, էլի կրկին անհետանում, եօթը սարի, եօթը ձորի քամակ կարդալու գնում ու քանի շատ են կարդում, այնքան աւելի են սարսաղում, էլ ոչ պատ են ճանաչում, ոչ ուտիս: Վարդապետի կամ քահանայի պատահած դէպքում ոչ «Աստուած օգնական է լըս-

վում նրանցից, ոչ «օրհնեա տէր», շատ-շատ ձեռքը մի ային-օյին դէպի շլապկէն կը տանեն ու «բարե ձեզ, տէր հայր» կասեն, հէնց գիտենաս թէ «տէր. հայրը» նրանց պէս օձ պարածող լինի: Մինն ասի. «ատա շըլըպկավեր պարուն, մէջքդ կը կոտրի, որ էդ զահը բումար շըլապկէդ վերցնես կուան տակիդ դընես, մօտենաս տէրի ացն առնես, մի ըռեխ «օրհնեա տէր» ասես ու մի պահպանիչ խընդրէս: Ասում են թէ տէրը վար ու ցանքս չունի: Խի, կարծում էք, թէ տէրը ձեզ պէս ձէթի ճրագ է, որ թեթև քամուց հանգչի: Մի նեղութիւն քաշեցէք, գնացէք դաշտը, տեսէք տէրն ինչպէս գութանի մաճը բռնած «հօ քեմատաղ, հօ» անելով ակոսի վրայ է դնում, կամ շորերը շալվարը հաւաքած մանգաղը ձեռին սարի նման կանգնած տրտը մի քանի սհաթում նստացնում է տեղը, կամ գերանդին երկու ձեռքով բռնած կանաչ դաշտին է ածիլում: Տէրի գերանդիի առաջ աբրեցումանման խոտերը հէրանց գնացող հարսների նման դէս ու դէն են տատանվում, — այդ բոլորը մի տեսէք, յետոյ մեր տէրի մասին խօսեցէք է: Մի պիտի տեսնէիք, ինչպէս մեր տէրը ձեռքերը դէպի երկինք բարձրացրած փառաբանում էր Աստուած օգնական, երբ նրա

Խաչի հողի արտը մորեխը մի քանի օրում
անհետացրեց։ Ես տէրի հնձողն էի. Լուսաւոր-
չի պասն էր, գնացել էինք միասին հնձելու,
վաղ առաւօտեան գնացինք և ինչ տեսանք.
մորեխն եկել էր, արտի սահմանը ծածկել ու
քիչ-քիչ առաջ էր շարժվում։ Տէրն այդ որ
տեսաւ, փափախը վերցրեց, երեսին խաչակըն-
քեց ու դարձաւ մորեխին հետեւալ խօսքե-
րով. «այ, դուք բարով էք եկել, հազար բա-
րի էք եկել. էդ որտեղ էիք, ձեր սուփրայ-
սեղանը այստեղ պատրաստ, դուք ուր էիք
մինչև այժմս անջուր ու անպտուդ անապատ-
ներումը թափառում. արտ ու դաշտը ձեզ
փէշքէշ, կերէք լիացէք, մենք վարել, ցանել,
բուսցընել ենք ձեզ համար։ Աստուծոյ տունը
շէն կենայ. նա մեզ մինին հսղար կը տայ։
«Գնանք, որդի ջան, գնանք, — դարձաւ ինձ
տէրը, — թող Աստուծոյ կամքը կատարվի։ Ես
էլ մարդ եմ, ես էլ պիտի իմ պատիժը կրեմ։
Մեծ է Աստուծոյ գթութիւնը. նա մեզ սո-
ված չի թողնի. երբ հաց չի լինի, խոտ կա-
րածենք. երբ ամեն բան ոչնչանայ, էլի մենք
սովամահ չենք լինի. Աստուծ իր երկնային
մանանէն մեզանից անպակաս կը պահի»։
Երաշտ է պատահում։ Տէրը դարձեալ
հանդսառութիւն չունի. սար ու ձոր չի մնում,

ամեն տեղ թափօր է անում, այս ու այն սըր-
բավայրում, վանքում ու անապատում մատաղ
է անել տալիս։ «Զեր մատաղը միշտ ընդու-
նելի կը լինի Աստծուն, — ասում է տէրը. —
Եթէ անկեղծ սրտով զոհ բերէք նրան։ Ամեն
մարդ իր կարողութեան համեմատ պիտի մի
բան զոհի ու սրբերի բարեխօսութիւնը խնդրի։
Եթէ եզն ունես, եզդ զոհիր. Եթէ արջառ—
արջառդ, եթէ ոչխար — ոչխարդ, եթէ ուլ—
ուլդ, իսկ եթէ շատ խեղճ ու քեասիբ մարդ
ես, այն ժամանակ գոնէ մի աքաղաղ զոհիր,
իմացած լինելով, որ քո միակ աքաղաղն էլ
այնքան ընդունելի է Աստծուն, որքան դրա-
ցի հարուստի եզը կամ արջառը։ Զար մար-
դիկ, Աստուծած նրանց թայփէն կտրցնի աշ-
խարհիս երեսից, — այդպիսի գեպքերում էլի
բամբասում են. «Զեր տէրը ստիպում է ձեզ
մատաղներ անել, լաւ իմանալով, որ երաշտի
վերջանալը կամ շարունակութիլը մատաղից չի
կախուած։ Այդ մատաղներից նա մեծ շահ
ունի, նախ քան մատաղացուի մորթելը նրան
պէտք է օրհնած աղ տալ, իսկ այդ աղն ով
է օրհնում. — տէրտէրը։ Զըք. — ոչ, մի կամ
երկու շահի սև փող է ստանում։ Այդ գեռ
բաւական չէ. մատաղի հէրին, ոտները, գլու-
խըն ու մորթին ում է պատկանում. — տէր-

տէրին։ Ժամկոչին էլ հօ Աստուած հեռու տանի։ Հարկ հաւաքողի պէս իւրաքանչիւր մատաղատիրոջ գլխին հարիրտա չաքուչ է զարկում ու ամեն տեղ կրինում։ «Լաւ, շատ լաւ, շատ օրհնուիս, տանով տեղով շէն կենաս, երեք հարիւր վաթսուն հալրապետների օրհնութիւնը քո ու քո օջաղից անպակաս լինի, էդ բոլոր տուածդ տէրին, բա թ'նձ, ես էլ եկեղեցու սպասաւոր եմ. ինձ որ զրկես, Աստուած էլ քեզ կը զրկի իր բարիքներից։ Ճարչի էալ մատաղատէրը հէրի միւսն էլ ժամկոչին է տալիս նրա անէծքներից ազատուելու համար։ Մի նեղութիւն քաշեցէք, պարոններ, — ասես այդ բամբասողներին, — գնացէք սպիտակամիրուք ծերերի մօտ այդպէս խօսեցէք, — միայն ոչ խելքից ընկած Մնացական ապօր մօտ, նա էլ ձեզ պէս փարմասոն ա։ Այ ինչ կասեն նրանք ձեզ. «Աստաղը ըսկըսած հայր Աբրահամից ու նոյ նահապետից Աստուծոյ սեղանի զարդն ա, որը բաց է բոլոր մահկանացուների առաջ, թէ հարուստի, թէ աղքատի, թէ մեծի, թէ փոքրի, թէ արանց և թէ կանանց։ Աստաղ անելով, մենք գնում ենք մեր զոհը Տիրոջ սեղանի վրայ, որին ամեն մարդ կարող է մօտենալ, իսկ առաւել ես քահանան, Տիրոջ ծառան»։ Ծերու-

նիները ուրիշ շատ իմաստուն բաներ կասեն դեռ, բայց իզուր. այդ պարոնները նրանց հասկանալ չեն կարող։ Մեր պապերից ու տատերից մնացած սովորութիւն է մատաղի աղն օրհնել տալը, հէրիները, մորթին, ոտներն ու գլուխը տէրտէրին ու ժամկոչին զրկելը, հակառակ դէպքում մատաղն անընդունելի կը լինի։ Ի՞նչ արած, որ մենք խաւար մարդիկ ենք, այիբ-բէնի համ չենք առել, քերականութին ու նրա նման հաստ հաստ գրքեր չենք կարդացել։ Ինչ ճանապարհով մեր պապերն են գնացել, այն ճանապարհով էլ մենք ենք գնում։ Մեր կապը մեր տէրի ձեռքին է. Նա լաւ է իմանում ուր է տանում մեզ. մենք էլ չենք հարցնում, թէ՝ ա տէր ուր ես տանում, այլ գլուխներս քաշ արած խաչուորի իշի պէս լետեկից գնում ենք։ Նա մեր հովիւն ա. ոչխարի հօտը հարցնում ա արդեօք թէ հովիւր նրան ուր ա քշում. մենք էլ նրա հոտն ենք, գնում ենք առաջ առանց հարց. նելու, լաւ իմանալով, որ մեր տէրը թոյլ չի տալ գալլերին մեր մի մաղին անդամ դիպչել։ Երաշտի ժամանակ, երբ երկնքից կրակ է թափւում, տէրը միմիայն մատաղներով չի զբաղւում։ Նա զիւղի պառաւ կանանց ետեկց գցած գնում է գետի յատակն արօրով վարե-

լու, որը նոյնպէս շարժում է Աստուծոյ գը-
թութիւնը։ Մի պիտի տեսնէք, ինչպէս տէրը
պառաւների հետ ընկած մինչև գօտին ջրի
մէջ թաղուած արօրը դէս ու դէն է ձգում,
շարականը շարականի ետևից երգելով, խրա-
խուսելով զառամեալ տատերին, որոնք նոյն-
պէս կիսով չափ ջրի մէջ ընկղմուած արտա-
սուք թափելով հետևում են տէրին, հաւա-
տացած լինելով, որ նրա աղօթքները կը հաս-
նեն Տիրոջ ականջին, ու փրկարար անձրենե-
ը լիութիւն կը տան այրուող, պլազող աշ-
խարհին։ Երբ «գետի վարելն» էլ չի օգնում,
կարծում էք, թէ տէրը յուսահատ տեղը նըս-
տում է—ոչ։ Նրա չարչարանքներն այն ժա-
մանակ կրկնապատկւում են. նա՝ այն ժամա-
նակ ոչ հանգիստ ուտիլ ունի, ոչ խմիլ, ոչ
քուն, ոչ հանգստութիւն, ոչ տուն, ոչ տեղ։
Քրիստոսի առաքեալի նման ոտաբորիկ ու գըլ-
խաբաց երկար ցուպը ձեռքին նա ճանապարհ
է ընկնում դէպի հեռաւոր Արթոն սարը։

Գիտէք արգեօք որտեղ է գանւում այդ
սուրբ լեառը. հեռու, շատ հեռու, Աստուծու
պատի տակին։ Ամպերն են միայն նրա գա-
գաթին հասնում։ Արեգակը, լուսինն ու աստ-
ղերն են միայն տեսնում, թէ ինչ հրաշքներ
են կատարւում նրա բարձրութեան վրայ։ Մե-

ղաւոր մահկանացուն երբէք ոտք չի դրել
նրա գագաթի վրայ. արդարներին է միտյն
նա մատչելի։ Նրա ձիւսազարդ գագաթի վրայ
հանգչում են Արթոն ճգնաւորի սուրբ նշանար-
ները։ Երաշտ տարիները ձիւնը քիչ քիչ հալ-
ւում է. հարիւրաւոր վտակներ ցած են հո-
սում դէպի լեռան խորքերը, իրանց հետ կեանք
և կենդանութիւն տարածելով ալրուող դաշ-
տերի համար։ Մեր տէրն ասում է, որ առա-
ջին վտակը գոյացաւ Արթոն ճգնաւորի արտա-
սուքներից։ Տէրը ոտաբորիկ ու գլխաբաց գի-
շեր ցերեկ գնում է դէպի Արթոն։ Գազան-
ներն անգամ խոնարհւում են նրա առաջ։ Տէ-
րի շարականների քաղցրահնչիւն մեղեդին զըս-
պում է նրանց։ Թուրք և քերդ խաշնարած-
ներն ու աւազակները չեն համարձակւում տէ-
րի մի մազին անգամ դիպչել, որովհետև նը-
րանք լաւ իմանում են, թէ ուր է գնում
տէրը, նրանք էլ ալրում են երկնքից թափ-
ւող կրակի մէջ ու զգում են որ իրանց փըր-
կութիւնը սուրբ Արթոնի գագաթից է գալու,
երբ տէրը ծունկ կը չոքի այնտեղ ու կը վերց-
նի նուիրական քարը։ Երկար տառապանքնե-
րից ու անքուն գիշերներից լետոյ տէրը վեր-
ջապէս հասնում է Արթոնի ստորոտին։ Ծունկ
է չոքում տէրը, գլուխը գետնին խոնարհեց-

նում ու աղի աղի արտասուք թափում։ Ի՞նչ
է խնդրում նա, ի՞նչ է աղաջում, պաղատում,
— այդ իրան է յայտնի։ Աստուած լսում է
նրա աղօթքը, ոյժ և արիութիւն է տալիս նը-
րան, և նա, մոռանալով կրած տանջանքները,
ոտի է կանգնում ու սկսում մեղմ, բայց հաս-
տատ քայլերով բարձրանալ լեռան գագաթը։
Ի՞նչ, ի՞նչ տանջանքներ չի կրում նա, ի՞նչ
վտանգների չի ենթարկվում։ անդունդների
ծայրերով է անցնում, անդունդների խորքեր
է իջնում, սրածայր քարերից ու մացառներից
բռնելով, քայլ առ քայլ առաջ է գնում, շո-
րերի փալասները թողնելով մացառների վրայ,
ձեռքերի ու ոտների արիւնով ներկելով ատամ-
նաւոր ժայռերը։ Տէրը ցաւ չի զգում։ նրա
հոգին ու միտքը ուրիշ տեղ են։ Վերջապէս
տէրը հասնում է գագաթին։ այդ ըոպէին նա
չի զգում, թէ ինչ է կատարւում իր հետ։
մոռանում է կրած ցաւերն ու նեղութիւննե-
րը։ նա իրան զգում է մի տեղ, որ ոշխարհ-
քից բարձր, շատ բարձր է, բոլորովին երկն-
քի, լուսնի ու աստղերի տակն է, մի տեղ, ուր
միայն արդարներն են ժողովւում, ուր մեղա-
ւորն իսկոյն կայծակահար կը լինի, եթէ համար-
ձակուի ոտք գնել այնտեղ։ Տէրի աչքերի ա-
ռաջ այնտեղից բացւում է Մասիսը նոյն տա-

պանով, Խոր վիրապն ու Ս. Եջմիածինը։ Երբ
տէրը մօտենում է Ս. Արթոնի գերեզմանին,
բոլոր մարմնով ցնցւում ու տարածւում է նը-
րայ վրայ։ Երկար, շատ երկար աղօթում է
տէրը, արտասուքը հեղեղի նման թափում է
նրա աչքերից։ «Ես քո սուրբ զօրութեանը մա-
տադ, ով մեծ ճգնաւոր, ասում է տէրը հե-
կեկալով, — երկնքից կրակ է թափում ու այ-
րում աշխարհքս։ Էլ արտերում հասկ չկայ,
գաշտերում խոտ ու ծաղիկ, ծառերի վրայ կա-
նաչ տերեւ։ Առուներն ու գետերը ցամաքել
են, աղբերների ակներում օձերն են բուն
դղել։ Մալդ ու անասուն կոտորւում են, նը-
րանց արտասուքից գետեր կարող են գոյա-
նալ, բայց այդ գետերը դառնութիւն միայն
կը տարածեն ամեն կողմ, այլ ոչ թէ կեանք
ու կենդանութիւն։ Ով սուրբ նահատակ, բա-
րեխօսիր Տիրոջ առաջ մեզ, մեղաւորներիս հա-
մար։ մեծ է նրա գթութիւնը։ Նա իր ստեղ-
ծած աշխարհը մի բուռը մեղաւորներին պատ-
ժելու համար չի ոչնչացնի։ Վերջացնելով իր
աղօթքն ու աղաջանքը, տէրը դողդոջուն ձեռ-
քով Ս. Արթոնի գերեզմանի վրայից մի փոք-
րիկ ձիւնաթաթախ ձիւնի նման սպիտակ քար
է վերցնում, խորին ջերմեռանդութեամբ համ-
բուրում նրան ու, փաթաթելով աբրշումի

թաշկինակի մէջ, դնում է ծոցը։ Վերջին ան-
գամ համբուրում է տէրը Արթոնի ս. գերեզ-
մանը ու ծանր քայլերը դէպի ցած ուղղում։
Տէրն ուրախ և զուարթ է. նա շարժում է
շատ ծանր, այնքան ծանր, կարծես իր ձեռ-
քերում բռնած լինի սկիհը ս. մասունքներով։
Տէրը ցաւ ու տանջանք այլ ևս չի կրում. մա-
ցառներն ու թուփերը նրա առաջ խսնարհւում
են ու սրածալը քարերն իրանց տակ թաղում,
— այնքան մեծ է ս. Արթոնի զօրութիւնը։
Երբ տէրը հասնում է լեռան ստորոտին, նրա
առաջին ալլ ևս ասեղ գցելու տեղ չի լինում,
հայ ու թուրք ամբողջ լեռնադաշտը ծածկած
իրանց հօտերով ու նախիններով նրան են
սպասում, թէ տեսնեն, ինչ խաբար է բերում
տէրը սուրբ Արթոնից՝ Խէր, թէ շառ, մահ,
թէ փրկութիւն։ Այդ միջոցին մեր տէրը նը-
մանում է Մովսէս մարգարէին տասը պա-
տուիրանները ձեռքին Սինա սարից իջնելիս։
Տէրի ձեռքին ճշմարիտ է ոչինչ չը կար, բայց
բոլոն էլ գիտեն, որ նրա ծոցում աբրշումէ
աղլուխի մէջ փաթաթած կայ «Արթոնայ քա-
րը», որ իր հետ կեանք ու փրկութիւն է բե-
րում ամբողջ աշխարհին։ Լեռնալին ժողովուր-
դը, որ բաղկացած է հայ և թուրք խաշնա-
րածներից, երկու մասի է ճեղքում ու տէրի

առաջին լայն ճանապարհ բաց անում։ Տէրը
գլխաբաց ու ստաբորիկ ձեռքերը դէպի եր.
կինք ամբարձած աղօթքներ մրմնջալով նը-
րանց միջով անցնում է։ Տէրի լուռ, բայց
զուարթ հայեացքը բաւական է նրանց հաս-
կացնելու, որ Աստուծոյ գլխութիւնը մեծ է.
Նա չի ոչնչացնիլ իր ստեղծած աշխարհը. պի-
տի աղօթել ու ծոմ պահել ու այդպիսով շար-
ժել նրա գթութիւնը։ Հայ և թուրք խոնարհ-
ւում են տէրի առաջ. հայերը փափախներ են
վերցնում, իսկ թուրքերը ձեռքերը սրտերին
գրած խորը երկրպագութիւն են տալիս մեր
տէրին։ Տէրը ծանր, խորհրդաւոր քայլերով
առաջ է շարժուում, կրկին մին-միայնակ շա-
րունակում է իր ճանապարհը օր ու գիշեր
համարեա մի հանգիստ ըոսէ չունենալով։
շատ որ լոգնի, գլուխը մի չոր քարի վրայ կը
դնի ու մի քիչ աչքահուփի տալուց յետոյ
կրկին ստաբորիկ կը շարունակի ճանապարհը,
նուիրական քարը երբէք ծոցից չը հանելով։
Վերջապէս տէրը հասնում է գիւղ. պիտի
տեսնէք ինչ փառաւոր մուտք է գործում նա
գիւղը։ Ժողովուրդը խուռն բազմութեամբ
դուրս է գալիս նրա առաջ։ Տէրը, աղօթելով,
լուռ անցնում է ժողովրդի միջով։ Խորին ակ-
նածութեամբ ամեն ոք խոնարհեցնում է իր

գլուխը մինչև գետին. շատերն արտասւում են: Բոլորն զգում են, թէ ինչ է ինդրում այդ բոպէին նրանց համար տէրը, որը, շարունակելով աղօթել, ուղղում է իր քայլերը դէպի եկեղեցին, իր յետևից ունենալով ողբացող ամբոխը: Եկեղեցու զանգակները աւտում են ամբողջ աշխարհին տէրի Արթոնից գալն ու ս. քարի անվտանգ տեղ հասնելը. Հեռու, շատ հեռու են սլանում զանգակների աւետարեր հնչիւնները, տարածելով ամեն կողմ յոյս, հաւատ և մխիթարութիւն: Տէրը, երբ մուտք է գործում եկեղեցին, իսկոյն ծունկ է չոքում ու չոք-չոք առաջ շարժւում դէպի ս. սեղանը: Երբ տէրը սեղանին է հասնում, կանգնում է տեղից ու կրկին տարածւում է գետնի վրայ. նա ծունը է դնում ու գոհութեան աղօթքներ կարգում, որ Աստուած արժանացրեց նրան Արթոնի գագաթից ս. քարը բերել: Դողդոջուն ձեռքերով հանում է տէրը ծոցից տրբաշումէ աղլուխն ու դնում սեղանի վրայ. յետոյ էլի մի քանի անգամ ծունը է դնում տէրը ու լուռ ուղղում իր քայլերը դէպի շէմքը: Տէրը դնում է տուն, ամբոխը ցրւում է: Նա ոչ ոքի հետ չի խօսում, մինչև անգամ իրանց տանեցիների հետ. նա պիտի մինչև պատարագի օրը միայն սուրբերի

ու հրեշտակների հետ խօսէ, օր ու գիշեր սաղմոսագիրքը կարդալով:

Վերջապէս հասնում է պատարագի օրը: Եկեղեցին լցում է ամբոխով. թէ դրսում և թէ ներսում ասեղ գցելու տեղ չի լինում: Տէրը պատարագիչ է: Բոլորի աչքերը դէպի ս. սեղանն են ուղղուած, ուր լուսազարդ խաչկալի առաջ կանգնած է տէրը, դակիրներով ու տիրացուներով շրջապատուած: Նրա առջև ս. սկիհի կողքին արծաթէ թեփշիի վըրայ դրած է Արթոնայ քարը արբաշումէ աղլուխով ծածկուած: Տէրը մեծ զերմեռանդութեամբ աղօթում է. ժողովուրդը նոյնպէս աղօթում է: Դրսից մտնողները հաղորդում են, որ երկնքի վրայ ամպեր են երևում: Պատարագը վերջանում է: Տէրը սաղաւարտը գլխին սեղանից իշնում է. ներքեսում խաչ, աւետարան, խաչուառն ու քշոցները պատրաստած նրան են սպասում: Տէրը, երբ ցած է իշնում, մի թեթև կարգ է կատարում ու վերջը նշան է տալիս առաջ շարժուել: Տիրացուներն սկսում են քաղցրահնչիւն շարականներն ու գուրս գնում եկեղեցուց. այժմս գնում են գետը Արթոնայ քարը ջուրը գցելու համար: Թափորի վերջում ծանր քայլերով շարժւում է տէրը, երկու ձեռքով բռնած ունենալով

արծաթի թեփշին, որի մէջ է ս. քարը: Ժողովրդի անժիւ, անհամար բազմութիւն խորին ակնածութեամբ շարժում է տէրի յետևից: Դպիրները տէրին խնկարկում են: Տէրը լուռ է. նա չի երգում. նրա սրտում մէծ խորհուրդներ են կատարում այդ ըոպէին: Ժամանակ առ ժամանակ տէրը նայում է երկնքին, կամ ուղղում է իր հայեացքը դէպի Արթոն, որտեղից այդ ըոպէին ամպերի կորտերը միմեանց յետևից դուրս են լողում: Երկինքը քիչ քիչ ծածկում է ամպերով. գետնի վրայ տեղ տեղ լայնածաւալ ստուերներ են երևում: Հասնում են գետը: Տէրն սկսում է կարգ կատարել. երգուում են շարականներ. յետոյ ծնկաչոք «Տէր ողորմեա»: Տէրը առանց հողաթափները հանելու մտնում է գետը ու մինչև ծնկներ թաղում ջրի մէջ: Նրա օրինակին հետևում են ծերերը, մահտեսիները (բացի փարմասուն մահտեսի Մնացական ապօրից, որը սատանէն է գիտում որ պտտի տակին նստած այդ միջոցին տէրին բամբասում է) ու իշխանները, որոնք կանգնում են ջրի մէջ այն կարգով, ինչպէս այդ լինում է Քրիստոսի Ակրտութեան օրը: Գըքակալը դընում են տէրի առաջին, և նա ջրի մէջ կանգնած մի քանի գլուխ աւետարան է կարդում:

Յետոյ սկսում է կրկին երգեցողութիւն: Բոլորը նայում են այն ըոպէին տէրին, որը, վերցնելով խորին երկիւղածութեամբ թեփշից Արթոնայ քարը, համբուրում է ու բաց թողնում ձեռքից դէպի գետի խորքը: Տէրը դուրս է գալիս գետից. Ժափորը դառնում է եկեղեցի: Այդ ըոպէին մուժը պատում է ամբողջ աշխարհը: Երկնքի վրայ արեգակն այլ ևս չի փայլում: Ամպերն ամեն ինչ ծածկում են: Եկեղեցու զանգակներն աւետում են ամբողջ աշխարհին կեանք և կենդանութիւն: Յանկարծ Արթոնայ կողմերում փայլում է կայծակն ու լուսաւորում մուժ երկինքը: Յանկարծ օդի մէջ լսուում է մի ուժգին շըվվոց, թափում են կենսաբեր անձրեսի առաջին կաթիւները, որոնք գնալով զօրեղանում են ու մեծանում: Աշխարհը լիանում է: Մարդ, անսասուն և բոյս կարծես մեռելութիւնից կենդանութիւն են ստանում, այնքան մեծ է նըրանց ուրախութիւնը: Առուակներն ու վտակները դէս ու դէն օձի նման ոլորտում. գետերը լայնանում ու մոնչում են: Ջրի կատաղի հոսանքը քարը քարի վրայ չի թողնում գետի խորքում. ոչ մի ծանրութիւն չի դիմանում ալիքների ուժգին հարուածներին, միայն մի փոքրիկ ձիւնափայլ քար անշարժ

ընկած է մնում իր տեղը։ Զրի ոչ մի հարուած նրան չի դիպչում, նրա տակի աւազը չի փորում։ Կատաղի հոսանքը նրա մօտով անցնելիս մեղմանում է ու կարծես մի քիչ հանգստանում, որ յետոյ նոր ոյժով առաջ շարժի ու շարունակի իր կատաղի կոխը քարերի ու ժայռերի հետ։ Այդ հրաշալի քարը Արթոնից բերուած ո. քարն է, որ իր հետ բերում է աշխարհին փրկութիւն երաշտից և որը մատչելի է միայն մեր տէրի նման արդարներին։ Այդպէս կատարում է այդ հրաշքը։

Նատ չէ անցնում, կրկին ծաղկում են լայնածաւալ դաշտերն ու հովիտները։ Կանաչ կարմիր գորգերը փռւում են այս ու այն կողմ։ Թուշունները նրանց մէջ թաւալում ու ծըւլում են, կարծես նրանք էլ օրհնելիս լինեն մեր տէրին։ Անասունների երամները կրկին ծածկում են լայնածաւալ դաշտերն ու հովիտները։ Հորթերը քամի վերցրած կայծակի արագութեամբ դէս ու դէն են վազում։ Նիհար ու գունաթափ արտերը կրկին բարձրացնում են իրանց գլուխները ու շարէ շար կանգնում, կարծես Ալաջա սարի դոշունը լինեն Մուխտար փաշային սպասելիս նրան ջարդ ու փշուր անելու ու շան օլինը գլխին դնելու համար։

Բայց ով է նրանց Լօրիս Մելիքովը, կը հարցնեն շատերը։ — մեր տէրը։ Նրա կարգին մատաղ ես. նա որ ըլ լինի մորեխի ու մկան աարիները սովից կը կոտորուինք, երաշտի տարին կրակի մէջ կալրուինք, իսկ ազարի ու խուլ ցաւի տարիները հող ու մոխիր կը կորչենք։ Ճշմարիտ է, կան անտաշ ու կոպիտ մարդիկ, որոնք երբեմն տէրի վրայ բարկանում են, բայց վերջն էլի փոշմանում են, ու գալիս նրանից թողութիւն խնդրում։ Լաւ չեմ յիշում երբ էր, տէրը Արթոն էր գնացել։ Այն տարուայ երաշտը մեծ չէր, միայն մեր կողմերումն էր. տէրը չէր ուզում գնալ. շատ որ խնդրեցին, տէրը վեր կացաւ, գնաց։ Յետ դառնալիս Խաչ-Բուլաղում նրան պատահում են թուրք հովիւներ։ Այդ տարին Խաչ-Բուլաղում սաստիկ անձրեներ էին գալիս։ Թուրքերը, երբ տեսնում են տէրին Արթոնից գալիս, իսկոյն իմանում են, որ տէրը գնացել ա անձրեւ բերելու. դառնում են նրան ու ասում. «Ա՛ քէշիշ, ա քո աղբաթը խէր ըլի, մենք այստեղ անձրեի տակ փտում ենք, իսկ դու գնացել ես էլի անձրեւ բերելու. բա մենք խեղճ չենք, մեզ Աստուած չի ստեղծել. Արի մեզ լսիր, քարը տար էլի կրկին իր տեղը դիր»։ Տէրը, ի հարկէ, նրանց չի լսում։ Թուրքերն

ուղում են քարը իլել. տէրն ասում է, որ
Արթոն ճդնաւորը ձեզ կուչ կածի: Թուրքերը
վախենում են ու քարին էլ համարձակում
չեն ձեռք տալ. կըկին խնդրում են, որ քա-
րը յետ տանի, տէրը չի լսում ու շարունա-
կում է իր ճանապարհը: Վայրենի հովիւներն
իրանց էլ կարողանում չեն զսպել ու սկսում
են մհակներով թակել տէրին. էլ ոչ ձեռք,
ոչ ոտ, ոչ մէջք, ոչ ուս են թողնում, — աչ
ու ձախ հէնց ածոց են անում ու նի պրա-
նում: Այդ գեռ բաւական չէ, անիրաւները
շներին տէրի յետևից քիս են տալիս: Բայց
մեր տէրն ընկած, գուրս եկած մարդ է, շատ
թալակից է նա պանիր կերել. պատահած տե-
ղը մազէ կարմնջով անց կը կենայ. ոտով այն-
քան Արթոն է գնացել, եկել, որ ամեն ձի էլ
չի կարող նրա հետ մանգպիլ¹⁾ չափել:

Ները երբ յարձակում են, տէրը, ջա-
հիլութիւնը միտը գցելով, փրացէն գոտիկն է
հաւաքում, երեսին մի թեթև խաչ տնում ու
զորս գու պատուիրեցեր ճոխտը վեր կենում:
Հովիւները տեսնում են որ ոչ թէ շները, այլ
հրացանի գնտակն անդամ նրա յետևից չի
հասնիլ: Այդպիսով տէրը շներից պրծնում է.

¹⁾ Տարածութիւն:

բայց երբ եկաւ տուն հասաւ, ամբողջ տասն
օր պարկեց: Անառոտուած հովիւները տէրի
ամբողջ մարմինը համարեա ջարդել էին. ա-
բաղ քսեցին տէրի ջանին, դէս արին, դէն ա-
րին, Դուլունց դալլաքն արին առաւ մարմնից
ու այլպիսով շուտով տէրին ոտի վրայ գրին,
որ Արթոնայ քարը հրետին գետը գցի: Քարը
գցեց. անձրևները մեր կողմերը եկան, իսկ
երաշտն անցաւ Խաչբուլադ: Թուրքերն այս
որ տեսան, իսկոյն հասկացան, որ տէրի ա-
նէծքը Ս. Արթոնը լսել է և հիմա նրանց
պատժում է:

Ի՞նչ անէին, ո՞նց անէին. վերջապէս վըճ-
ռեցին մի-մի գառ առած գան տէրից թողու-
թիւն խնդրեն. եկան իրանց իւզբաշու հետ
միասին, տէրի համար մինչև 10—15 գառը
բերին, մեղայ եկան ու խնդրեցին, որ տէրն
աղօթի ու խնդրի Արթոն ճգնաւորին ների
նրանց: Տէրն ընդունեց գառները, իրատեց
թուրքերին ու խոստացաւ աղօթել: Ս. Ար-
թոնը լսեց տէրի աղօթքներն, ու շաբթից
յետոյ Խաչբուլադում կըկին սկսուեցին անձ-
րւեները:

Ասենք թուրքերին էլի մի կերպ կարելի
է ներել, որ նրանք տէրի քէֆին դիպան.
Ճոկ հաւատի մարդիկ են. նրանք երբեմն ի-

ըանց մօլլին էլ մի բանի տեղ չեն դնում, ոչ
թէ միայն մեր տէրին։ Տեսէք, ինչ էին ու-
զում անել տէրի հետ հայ քրիստոնեայ մար-
դիկ։ Կոռուի տարին էլի սաստիկ երաշտ էր,
իսկ տէրը հակառակի պէս հիւանդ պարկած
էր. դէս ու դէն արին, մի կերպով տէրին լա-
ւացրին ու Արթոն ուղարկեցին։ Տէրը վայ էն
հալին գնաց, քարը բերաւ ու ջուրը գցեց։
Երաշտը, ինչպէս միշտ, այդ անգամ էլ ան-
հետացաւ։ Մեր կողմերում լաւ անձրևներ ե-
կան, իսկ Քարկապի ու Դառչովի սարերի վը-
րայ սաստիկ կարկուտ եկաւ ու բոլոր արտե-
րը ոչնչացրեց։ Դժբաղդութիւնը մեծ էր, բայց
ինչ արած, Աստուծոյ պատիժ էր, պէտք էր
համբերութեամբ տարած։ Յայտնի է, որ քար-
կապեցիք ու դառչովեցիք կոշտ ու կոպիտ լեռ-
նականներ են։ Նրանց համար օրէնք չը կայ
գրած։ Նրանք համբերել չը գիտեն։ Բոլոր
մեղն իսկոյն խեղճ տէրի վրայ գցեցին, ասե-
լով։ «Նրա տունը իր գլխին քանդվի։ Նա խի
ա գնացել կարկուտի քար բերել։ Մենք նրան
ասել ենք անձրևի բեր, թէ կարկուտի։ Ահը
էդ եադի տարած երէցը տակէց մեզ հետ չու-
նի, այս տարի մենք էլ գնացինք, ինդը-
ցինք, որ Արթոն գնալ անձրևի քար բերի.
աջահամբուրդ, — ասացինք, — ա տէր, յետոյ կը

տանք։ Տուն կրակ ընկածը գնաց ու մեզ հա-
մար կարկուտի քար բերաւ, ա կարկուտը նրա
տուն ու տեղը սկի, տանի։ Աչքովս տեսայ,
ինչպէս մի կիսավայրենի դառչովեցի կատա-
զութիւնից պուոշները կրծոտում էր ու, գլու-
խը թափահարելով, ինքն իրան մողնչում և
ասում. «Ը՛ը՝ Արթոնայ երէց, էդ որտեղ ես.
ուր ես, մի ճանկս ընկնես, թիքա-թիքա կո-
տորեմ քեզ։ Անձրևի քարը գլխէդ կտրվել
էր, որ կարկուտի բերան»։ Այդ գեռ բաւա-
կան չի. սարսաղ դառչովեցիներն ուզում էին
գնան սրբազնին գանգատ անել, թէ «Սուր-
բազն հայր, տէր. Առուշանը գնացել ա Ար-
թոնայ սարը կարկուտի քար բերել ու մեր
տուն ու տողը քանդել։ Նրան հող ու մոխիր
կորցրու, թէ հու չէ գնում ենք կաթղակոսին
գանգատ»։

Տեսանք, որ բանն այդտեղ է հասնում,
մի քանի իշխան մարդիկ ուղարկեցինք Քար-
կապ ու Դառչով, որ մի կերպով խև լեռնա-
կաններին խելքի բերեն ու տէրի հետ հաշ-
տեցնեն։ Մեր մարդիկը գնացին ու ասացին.
«Ա՛ մարդիկ, զիժ չէք, պել չէք. անձրևի քա-
րը ո՞րն ա, կարկուտի քարն ո՞րը։ Արթոնայ
քարը մի տեսակ է լինում. մենք տեսել ենք.
մեր տէրը մեզ ցոյց ա տալիս։ Քարը ջուրը

գցելուց յետոյ երկնքից կամ փրկութիւն, կամ պատիժ պէտք է սպասել։ Եթէ մեր աղօթք ներով Աստուծոյ գութը շարժում ենք, անձրւ է գալիս, իսկ եթէ ոչ, նա աւելի սաստիկ է պատժում ու կարկուտ է ուղարկում, — ուրեմն տէրը ինչ մեղք ունի այստեղ։ Ասում էք՝ գնանք սուրբազանին գանգատ անենք. իսկի միաք էք անում, թէ ինչ էք ասում։ Լաւ, գնացիք գանգատ արիք։ Նա որ ձեր գանգատը բանի տեղ չդրաւ, կասէք, գնում ենք կաթղակոսին գանգատ անենք։ Սուրբազանը կամի՝ լաւ գնացէք։ Կը գնաք եջմիածին։ Ով ա իմանում, բալքի կաթղակոսը ձեզ ծուռ ա համարում ու տնիծում։ Բաւական ա, որ նա մի բերան ասի՝ «անիծեալ լինէք»։ Այն ժամանակ ոչ էս աշխարհում, ոչ էն աշխարհում հանգստութիւն չէք ունենալ դուք. ոչ թա ոչխար, գառը, եղն ու արջառ, այլ որ ձեր որդկերանց էլ մատաղ անէք սուրբերին, էլի էն աշխարհում դժոխքի տանջանքներից չէք պլծնիլ»։

Այս որ լսում են լեռնականները, շլինքները քորում են ու վճռում են իրանց միջից մի քանի աղսախկալներ ուղարկել տէրի մօտ նրա աջն առնելու ու թողութիւն խնդրելու։ Աղսախկալներն եկան. տէրի համար պանիր,

կարագ ու մեղը բերան իրանց հետ, թողութիւն խնդրեցին ու աջն առան։ Տէրը ներեց ու օրհնեց նրանց, բայց գորանից յետոյ համարեա մի ամբողջ տարի նա ոտք չի դրեց Քարկապի ու Դառչովի կողմերում. այն վայրենիները ով է իմանում ինչ օվին դնէին տէրի գլխին, եթէ նա նրանց մէջ երևար։

Զի կարելի ասել, թէ մեր տէրը վախկոտ մարդ է։ Հարկը պահանջած դէպքում նա միշտ պատարաստ է իր կեանքը մահու տալ իր ժողովրդի համար. ազար, մահ, ցաւ, հազար ու մի չոռ ու ցաւ պատահած դէպքում նա հօր պէս իր ժողովրդին հսկում է ու պաշտպանում է նրան ամեն տեսակ պատուհասներից։ Խուլ ցաւի¹⁾ տարին մեր տէրն էր, որ կարողացաւ իր ժողովրդին Աստուծոյ ճանապարհի վրայ պահել ու փրկել նրան անդառնալի կորստից ու դժոխքի անվերջ չարչարանքներից։ Խուլ ցաւն ով չի տեսել. ազար ա, քամու պէս մի քանի օր, շատ շատ մի քանի շաբաթ փչում է ու կըկին անհետանում։ Մեռնողը մեռնում ա, ապրողն ապրում. ում ճակատին ինչ գրուած է, այն է կատարուում. զարմանալի ոչինչ չը կայ։ Բա դու չես ասիլ,

¹⁾) Խուլերա։

որ այն ժամանակ գտնուում էին մարդիկ, որոնք
մեղ ու մեր տէրի վրայ ծիծաղում էին ու ու-
զում էին մեղ առանց աղօթքի ու մատաղի
մահի ճանկերից ազատել: Հակառակի պէս խուլ
ցաւն ամառուայ ժամանակն էր, երբ աշխարհ-
քիս ամեն կողմէրից շըլապկաւորներ են գա-
լիս, շէնս լցուում. մինը Մոսկովի սամթիցն ա,
մի ֆրանգի, մինը Լէմսի, մինն Ինգլիզի, —
մի խօսքով որտեղ ալիբ-բէն սովորող կայ,
փախած շէնս ա գալիս, ինչպէս իրանք գրա-
բար ասում են՝ «մի փոքր ինչ հանգստանա-
լու ու թարմ օդ շնչելու համար»: Գալիս են
մեծ մեծ խօսում ու մեղ խելք սովորեցնում.
Էլ ոչ հնձում են, ոչ խալսում, ոչ վարում
են, ոչ ցանում: Նրանց բանը հէնց այն ա՝
հաւաքուել էս ծառի, էն ծառի տակ, էս աղբ-
րի, էն աղբրի մօտ, նայել էս հարսի, էն հար-
սի յետենից, կասես, թէ մեր հարսներն իրանց
տեսած շըլապկաւորներից լինեն: Հա, ասեցի,
որ խուլ ցաւի տարին էդ պարունները շէնս
լցրել էին: Երբ մի, երկու մեռնող եղաւ, մին
էլ տեսանք մեր շըլապկաւորները՝ որը թուղթ
ու դալամ, որը կագէթ ձեռներին շէնս ըն-
կած ման են գալիս, շներին հաչացնելու հա-
մար գիւղի գզիրին իրանց առջելից ունենա-
լով: Գզիրը մի բերան հէնց գոռում էր. «ա-

միտարնիք են գալիս, ա խալիսը, գոներն ու
տները թամուզ արէք»: Ազգբում բան չէինք
հասկանում, յետոյ իմացանք, որ մեծաւորը
մեր շըլապկաւորներին սամիտարնիք ա նշա-
նակել ու հրամալել նրանց, որ մեր ու շըլա-
կայ գիւղերի վրայ հսկեն: Դէ եկ էշը փխա-
կից հանի. առաջ մենք հանգստութիւն չու-
նէինք շըլապկաւորներից, իսկ հիմա նրանք
մեր հոգիները բոլորովին կը հանեն, — այդ էր
մեր բոլորիս կարծիքը և հէնց՝ համարեա այդ-
պէս էլ եղաւ: Անունները սամիտարների գը-
րած, կազէթները ձեռներին շէնս ընկած ա-
մեն մի պատի տակի սրան-նրան քարոզ են
տալիս, թէ էս կերէք, էն ոչ, էս խմեցէք,
էն ոչ, կասես, թա խուլ ցաւը երբ գալիս ա
պկեցդ բռնում, հարցնում ա, թա էսօրի ինչ
զահրումար ես կերել կամ խմել: Այդ դեռ
բաւական չի. ասում են՝ պաս միք պահիլ
մեռելի վրայ միք խմբուիլ ու լաց լինիլ. ա-
սում են առհասարակ միմեանցից ճոկ-ճոկ ման
եկէք. մի տեղ միք հաւաքուիլ (ուզում էին
հասկացնել, որ ժամ ըլ գնանք, թափօր չա-
նենք). ժամարարին ու ժողովրդին ժամահաց
մի տուէք. մատաղ միք անիլ, այդ բաներից
ցաւն աւելի կը տարածուի: Մինն ասէր. «ա-
տա ցաւը դուք ինքներդ էք. ոտից մինչեւ

գլուխ սպիտակ շորեր հագած, հենց էք ջաղացանի ալբաթաթախ շներ լինէք, ուր որ գնում էք, ցաւը ձեր վրայից թափւում ա»։ Բայց ասող չը կար. ով պիտի մեզանից ասէր. մենք խեղճ ըռհաթ մարդիկ ենք. մեր գլխին մեծ ու մեծաւոր ունինք։ Եթէ ասէինք, սամիտարնիքը կը գնալին մեծաւորին գանգատ. նա էլ ասողին կը կանչէր, կը բարկանար, մի երկու անգամ ճպատով կը տար ու գեռ ըշտրափ էլ կառնէր։ Ասենք մեծաւորը մեր աղէն ա, թող տալ, եթէ հարկաւոր ա տալ, նրա տուածից ցաւ չի տալիս. իսկ սամիտարնիքն ինչացու են, որ նրանց համար մեր աղէն մեզ վրայ բարկանայ ու իր քէֆը խարաբ անի։ Սամիտարնիքը տեսան, որ մենք սուս ենք կենում, աւելի սարսաղուեցին։ Կոտրած գդալի պէս սկսեցին ամեն բանի մէջ ընկնել, խառնուել. էլ թող չէին անում, որ մի հալալ հաց ուտենք, կամ մենք մեր գլխի ճարը տեսնենք։ Նատ որ զահլա տարան, մի քանի մարդ հաւաքուեցինք ու գնացինք տէրին գանգատուելու, թա՝ «ա տէր, կարդիդ մատաղ, դու ալդ ոչ բարով սամիտարների ըռեխը մի փոքր հաւաքի, նրանց աչքը մի քիչ վախցրու»։ Ակզբում տէրն էլ մի քիչ քաշում էր նրանցից. նա ասաց մեզ. «ա որդիք, ո՞նց վախց-

նեմ նրանց, որոնք ոչ Աստուածանից են վախենում, ոչ մարդկանցից, որոնց համար ոչ վերջի գատաստան կայ, ոչ Գաբրիէլ հրեշտակապետ, որոնք միշտ կազէթներ են կարդում ու մեծաւորների հետ խօսում, կարծես իրանք էլ մեծաւորներ լինեն»։ Բայց էլի մեր յոյսը տէրից չը կտրեցինք. բոլորս էլ միաբերան ասում էինք, որ նա մեր շէնը պէտք ա սամիտարներից փրկի. Նրանց յետևից այն ժամանակ ցաւը կամաց-կամաց կանհետանայ։ Վարդավառի պատում ցաւը սաստկացաւ։ Ամեն տան համարեա թէ սուգ ու շիւան էր տիրում։ Սամիտարնիները շէնս ընկած քարոզում էին, որ գիւղացիներն ամենևին պաս չը պահեն. մսեղէն կերակուր գործածեն։

Մեր տէրն այդ ժամանակ էլ հանգստութիւն չունէր. մեռելը մեռելի յետևից տանում էր գերեզմանատուն, յետոյ մի քանի մեծ մարդկանց հետ գալիս էր մեռելատուն ժամահաց ուտելու ու մի-երկու ողորմի ասելու. բացի այդ միւս ազատ ժամերին փոխանակ հանգիստ տանը նստելու ժողովուրդն ետևից արած գընում էր այս կամ այն սըբատեղին թափօր կատարելու։ Այդ թափօրների ժամանակ լաց էր լինում տէրը, լաց էր լինում ժողովուրդը. ամեն մարդ իր աչքի առջև տեսնում էր մա-

հը և ողբում էր ոչ թէ իր, այլ իր սիրելիներին սպառնացող կորուստը:

Մահը երբ սաստկացաւ, տէրը բացի թափօրներ կատարելուց սկսեց նաև խոստովանելու հաղորդել ժողովրդին, մեծից սկսած մինչև փոքրը: Վարդավառ կիրակի օրը մեր տէրը մեծ կարգ կատարեց եկեղեցում: Պատարագի ժամանակ բոլորի աշքերում արտասուր էր փայլում. ամեն մարդ, ջերմեռանդ աղօթելով իր մեղքերն էր քաւում: Երբ տէրը կանգում էր դէպի ժողովուրդն ու «խաղաղութիւն ամենեցուն» ասում, բոլոր ներկայ եղողները ծունկ էին չոքում ու թեքում իրանց գլուխները դէպի գետին, հեղեղի նման արտասուր թափելով աչքերից: Երբ տէրը ս. սկիհը երկու ձեռով բռնած չոքեց սեղանի ծալրին, նախքան հաղորդութեան ս. խորհուրդն սկսելը, նա դարձաւ ժողովրդին հետևեալ խօսքերով. «Սիրելի եղբայրներ և քոյրեր, սիրելի ժողովուրդ հայոց, ողջոյն և աւետիք ձեզ: Հրեշտակների փողերը հնչում են երկը բարձրութեան վրայ: Տէրը կանչում է մեզ իր մօտ. թողնենք մեր մեղքերը այս անցաւոր աշխարհում, մաքուր խղճով ու արդար սրտով շտապենք տեղ բռնել արդարների շարքում, Տիրոջ աջ կողմում: Ամբողջ աշխարհս տառապում

է մեղքերի ծանրութեան տակ: Մենք պիտի քաւենք մեր մեղքերը, որ Տէրը մեզ չը պատժի, որ նա հեռացնի մեզնից այս մահաբեր ցաւը. բայց ընդհակառակը փոխանակ այդ անելու, ուզում են մեր մեղքերի վրայ նոր-նոր մեղքեր բարձել, որ մենք իսպառ ոչնչանանք, որ գժոխումն էլ մեզ համար տեղ չը գլունուի: Մեզ ասում են՝ պասն ի՞նչ ա, պաս միք պահիլ, ժամն ի՞նչ ա, ժամ միք գնալ, հոգեհացն ի՞նչ ա, քահանալին ու ժողովրդին հոգեհաց միք տալ, — բայց բոլորը տեսնուած ու լսուած բան ա, սիրելի ժողովուրդ, բա գիտէք, թա վերևից այդ Տէրը չի լսում ու չի տեսնում: Խուլ ցաւն էլ միւս պատուհասների պէս Աստուածալին պատիժ ա. ում ճակատին գրուած է նրանից մեռնելը, կը մեռնի, ում ոչ, — ոչ: Մահի ճանկերից չի կարելի փախչել. մահն Աստուած է ուղարկում մեզ համար: Ուր էլ լինենք՝ մեզ փնտող մահը համար: Ուր էլ լինենք՝ մեզ փնտող մահը կը գտնի մեզ. ոչ սար, ոչ ձոր, ոչ անտառ, ոչ անապատ մեզ թագցնել չեն կարող նրանից: Նա ոչ մի արգելքից չի վախենում. նա ամեն բան տեսնում ա, ամեն բան իմանում: Եթէ նա տանում է մեղաւորին, այդ պատիժ է նրա մեղքերի, նրա անարժան կեանքի համար. եթէ նա տանում է արդարին, անմեղ

մանկան, այդ գէպքում նոյնպէս Տիրոջ հրամանն է կատարում, որպէս զի արդարը չը փշանայ այս մեղաւոր աշխարհում, ուր ամենքայլափոխում մարդ կարող է գայթակղուել ու խաբուել սատանայից: Իսկ զիտէք ո՞վ է և ո՞ւր է սատանան. նայեցէք ձեր չորս կողմը և կը տեսնէք նրան: Այդ սատանան այժմս ամեն բոպէ ձեր ականջին փսփում է՝ «պաս կերէք, միշտ իւղ ու փլաւ վայելեցէք, եկեղեցում ու ուխտատեղերում միք կուտակուիլ, թափօրները ձեզ մահից չեն փրկիլ, մեռելների ետևից խմբերով միք գնալ, նրանց դիակներին միք դիմչիլ, եթէ դիմչէք էլ, ձեռնեռդ ահա այս դեղերով լուացէք, մատաղներ միք անիլ, մատաղի միս բաժանելով, դուք ցաւն աւելի էք տարածում, հոգեհաց միք տալ, տէրտէրը թող գնայ իրա տանը հաց ուտի, նա իր պարտաւորութիւններն է միայն կատարում, դուք պարտաւոր չէք նրան ու նրա տիրացուներին կերակրելու», մի խօսքով թշու բան չի մնում, որ սամիշտարնի սատանան ենք չասի: Միք լսիլ, սիրելիք իմ. նզովեալինի նա, ով կը լսի սամիշտարնուն, այս ս. հաղորդութեանը անարժան է այդպիսին. նը-ան ոչ թէ միայն խուլ ցաւ, այլ այն աշխար-

Հում դժոխքի անվերջ ահռելի չարչարանքներն են սպասում»:

Այդպէս մեր տէրը ներկեց սամիտարներին և չը թողեց, որ իր ժողովրդի կապը նըրանց ձեռքում մնայ:

Մինչև օրս ել մեր տէրն է իր ժողովը
դին ուղիղ ճանապարհ ցոյց տալիք: Լուծը մեր
ուսերին դրած, մեր տէրը լծան վրայ նստած
գութանի հօտաղի պէս հօ անում մեզ ու ա-
ռաջ քշում: Երբ տեսնում է, որ մէկը ճա-
նապարհից ծուռում ա, ճիպոտն առնում ու
այնքան նի պրանում, աջ ու ձախ խփում,
որ նա կրկին իր խելքը գլուխն է հաւաքում
ու կրկին լուռ ու մունջ շարունակում տէրի
ցոյց տուած ճանապարհով գնալ:



6460

2013

«ԼՈՒՄԱՅ»

գրական հանդիսից արտատպուած գրքերի
ցուցակ

1. ԻՍ. ՅԱՐՈՒԹԻՒՆԵԱՆ. Ստեփաննոս Պալա-
սանեան դ. 25 կ.
2. ՊՕՏԱՊԵՆԿՕ. Մի կտոր Հաց. թարգմ. Դ.
Քահ. Աղանեանց դ. 10 կ.
3. ՍԵՆԿԵԻՆ. Դէպի Աթէնք. թարգմ. Դ.
Քահ. Աղանեանց դ. 15 կ.
4. Դաստիարակութեան զօրութիւնը. թարգմ.
Ս. Մանդինեան դ. 30 կ.
5. ԲԱԿ Կիլիկիա դ. 15 կ.
6. Ն. ՏԵՐԿԱՐԱՊԵՏԵԱՆ. Խաչատուր Աբովյան
7. Անժամանակ թատրոն և ընթերցանութիւն.
թարգմ. Ս. Մանդինեան դ. 25 կ.
8. ՊԵՍՏԱԼՕՑԻ. Լինչարդ և Գերարուդ.
թարգմ. Իս. Յարութիւնեան
9. ԻՍ. ՅԱՐՈՒԹԻՒՆԵԱՆ. Աշակերտի յուշա-
տեարը դ. 30 կ.
10. ՍՏ. ԱԻԵՑԻՔԵԱՆ. Ղեկավարներ դ. 40 կ.

ԳԻՆՆ Է 40 ԿՈՊԵԿ